

四庫全書

史部

欽定四庫全書

史部

陝西通志卷九十四

詳校官監察御史劉湄

檢討臣德生覆勘

總校官降調編修臣倉聖脉

校對官編修臣盧遂

謄錄監生臣范鍾

欽定四庫全書

陝西通志卷九十四

藝文十

論說

辨考

題跋

祝祭

弔誄

雜著

過秦論一

漢

賈誼

秦孝公據殽函之固擁雍州之地君臣固守以窺周室  
有席卷天下包舉宇內囊括四海之意并吞八荒之心  
當是時也商君佐之內立法度務耕織脩守戰之具外  
連衡而闘諸侯於是秦人拱手而取西河之外孝公既

沒惠王武王蒙故業因遺策南兼漢中西舉巴蜀東割膏腴之地北收要害之郡諸侯恐懼會盟而謀弱秦不愛珍器重寶肥美之地以致天下之士合從締交相與為一當是時齊有孟嘗趙有平原楚有春申魏有信陵此四君者皆明知而忠信寬厚而愛人尊賢重士約從離衡并韓魏燕楚齊趙宋衛中山之衆於是六國之士有寧越徐尚蘇秦杜赫之屬為之謀齊明周最陳軫昭滑樓緩翟景蘇厲樂毅之徒通其意吳起孫臏帶佗兒



良王廖田忌廉頗趙奢之倫制其兵嘗以十倍之地百萬之衆叩關而攻秦秦人開關延敵九國之師逡巡遁逃而不敢進秦無亡矢遺鏃之費而天下諸侯已困矣於是從散約解爭割地而賂秦秦有餘力而制其敝追亡逐北伏尸百萬流血漂鹵因利乘便宰割天下分裂河山彊國請服弱國入朝施及孝文王莊襄王享國日淺國家無事及至始皇續六世之餘烈振長策而御宇內吞二周而亡諸侯履至尊而制六合執棊枰以鞭笞

天下威振四海南取百越之地以為桂林象郡百越之君俛首係頸委命下吏乃使蒙恬北築長城而守藩籬却匈奴七百餘里胡人不敢南下而牧馬士不敢彎弓而報怨於是廢先王之道焚百家之言以愚黔首墮名城殺豪俊收天下之兵聚之咸陽銷鋒鑄鐻以為金人十二以弱天下之民然後踐華為城因河為津據億丈之城臨不測之谿以為固良將勁弩守要害之處信臣精卒陳利兵而誰何天下已定秦王之心自以為關中

之固金城千里子孫萬世帝王之業也秦王既沒餘威振於殊俗陳涉甕牖繩樞之子氓隸之人遷徙之徒才能不及中人非有仲尼墨翟之賢陶朱猗頓之富躡足行伍之間而崛起阡陌之中率罷散之卒將數百之衆轉而攻秦斬木為兵揭竿為旗天下雲集響應贏糧而景從山東豪俊遂並起而亡秦族矣且夫天下非小弱也雍州之地殽函之固自若也陳涉之位非尊於齊楚燕趙韓魏宋衛中山之君鉏耰棘矜非鏃於鈞戟長鎗

也適戍之衆非抗於九國之師深謀遠慮行軍用兵之道非及鄉時之士也然而成敗異變功業相反也試使山東之國與陳涉度長絜大比權量力則不可同年而語矣然秦以區區之地千乘之權招八州而朝同列百有餘年矣然後以六合為家殽函為宮一夫作難而七廟墮身死人手為天下笑者何也仁義不施而攻守之勢異也

過秦論二

前人

秦并海內兼諸侯南面稱帝以養四海天下之士斐然

鄉風若是者何也曰近古之無王者久矣周室卑微五霸既沒令不行於天下是以諸侯力政彊侵弱衆暴寡兵革不休士民罷敝今秦南面而王天下是上有天子也既元元之民冀得安其性命莫不虛心而仰上當此之時守威定功安危之本在於此矣秦王懷貪鄙之心行自奮之智不信功臣不親士民廢王道立私權禁文書而酷刑法先詐力而後仁義以暴虐為天下始夫并兼者高詐力安定者貴順權此言取與守不同術也秦

離戰國而王天下其道不易其政不改是其所以取  
之守之者異也孤獨而有之故其亡可立而待借使秦  
王計上世之事並殷周之跡以制御其政後雖有淫驕  
之主而未有傾危之患也故三王之建天下名號顯美  
功業長久今秦二世立天下莫不引領而觀其政夫寒  
者利裋褐而饑者甘糟糠天下之嗷嗷新主之資也此  
言勞民之易為仁也鄉使二世有庸主之行而任忠賢  
臣主一心而憂海內之患縞素而正先帝之過裂地分

民以封功臣之後建國立君以禮天下虛囹圄而免刑  
戮除去收帑污穢之罪使各反其鄉里發倉廩散財幣  
以振孤獨窮困之士輕賦少事以佐百姓之急約法省  
刑以持其後使天下之人皆得自新更節修行各慎其  
身塞萬民之望而以威德與天下天下集矣即四海之  
內皆謹然各自樂安其處惟恐有變雖有狡猾之民無  
離上之心則不軌之臣無以飾其智而暴亂之奸止矣  
二世不行此術而重之以無道壞宗廟與民更始作阿

房宮繁刑嚴誅吏治刻深賞罰不當賦斂無度天下多  
事吏弗能紀百姓窮困而主弗收恤然後姦僞並起而  
上下相連蒙罪者衆刑戮相望於道而天下苦之自君  
卿以下至於衆庶人懷自危之心親處窮苦之實咸不  
安其位故易動也是以陳涉不用湯武之賢不藉公侯  
之尊奮臂於大澤而天下響應者其民危也故先王見  
始終之變知存亡之機是以牧民之道務在安之已天  
下雖有逆行之臣必無響應之助矣故曰安民可與行



義而危民易與為非此之謂也

過秦論三

前人

秦并兼諸侯山東三十餘郡繕津關據險塞脩甲兵而  
守之然陳涉以戍卒散亂之衆數百奮臂大呼不用弓  
戟之兵鉏耰白梃望屋而食橫行天下秦人阻險不守  
關梁不闔長戟不刺強弩不射楚師深入戰于鴻門曾  
無藩籬之艱於是山東大擾諸侯並起豪俊相立秦使  
章邯將而東征章邯因以三軍之衆要市於外以謀其

上羣臣之不信可見於此矣子嬰立遂不寤藉使子嬰  
有庸主之才僅得中佐山東雖亂秦之地可全而有宗  
廟之祀未當絕也秦地被山帶河以為固四塞之國也  
自繆公以來至於秦王二十餘君常為諸侯雄豈世世  
賢哉其勢居然也且天下嘗同心并力而攻秦矣當此  
之時賢知並列良將行其師賢相通其謀然困於阻險  
而不能進秦乃延入戰而為之開關百萬之徒逃北而  
遂壞豈勇力智慧不足哉形不利勢不便也秦小邑并

大城守險塞而軍高壘毋戰閉關據扼荷戟而守之諸  
侯起於匹夫以利合非有素王之行也其交未親其下  
未附名為亡秦其實利之也彼見秦阻之難犯也必退  
師安土息民以待其敝收弱扶疲以令大國之君不患  
不得意於海內貴為天子富有天下而身為禽者其救  
敗非也秦王足已不問遂過而不變二世受之因而不  
改暴虐以重禍子嬰孤立無親危弱無輔三主惑而終  
身不悟亡不亦宜乎當此時也世非無深慮知化之士

也然所以不敢盡忠拂過者秦俗多忌諱之禁忠言未  
卒於口而身為戮沒矣故使天下之士傾耳而聽重足  
而立箝口而不言是以三王失道忠臣不敢諫智士不  
敢謀天下已亂奸不上聞豈不哀哉先王知壅蔽之傷  
國也故置公卿大夫士以飾法設刑而天下治其強也  
禁暴誅亂而天下服其弱也五伯征而諸侯從其削也  
內守外附而社稷存故秦之盛也繁法嚴刑而天下振  
及其衰也百姓怨而海內畔矣故周王序得其道而千

餘年不絕秦本末並失故不長久由此觀之安危之統  
相去遠矣野諺曰前事不忘後事之師也是以君子為  
國觀之上古驗之當時叅以人事察以盛衰之理審權  
勢之宜去就有序變化應時故曠日長久而社稷安矣

徙戎論節

晉  
江統

漢都長安關中之郡號曰三輔禹貢雍州宗周豐鎬之  
舊也及至王莽之敗赤眉因之西都荒毀百姓流亡建  
武中以馬援領隴西太守討叛羌徙其餘種於關中居

馮翊河東空地而與華人雜處數歲之後族類蕃息既恃其肥彊且苦漢人侵之永初之元騎都尉王弘使西域發調羌氏以為行衛於是羣羌奔駭互相扇動二州之戎一時俱發覆沒將守屠破城邑鄧騭之征棄甲委兵輿尸喪師前後相繼諸戎遂熾至於南入蜀漢東掠趙魏唐突軹關侵及河內及遣北軍中候朱寵將五營士于孟津距羌十年之中戎夏俱斃任尚馬賢僅乃克之此所以為害深重累年不定者雖由禦者之無方將

非其才亦豈不以寇發心腹害其肘腋疾篤難療瘡大  
遲愈之故哉自此之後餘燼不盡小有際會輒復侵叛  
馬賢狃怙終於覆敗段熲臨衝自西徂東雍州之戎常  
為國患中世之寇惟此為大漢末之亂關中殘滅魏興  
之初與蜀分隔疆場之戎一彼一此魏武皇帝令將軍  
夏侯妙才討叛氐阿貴千萬等後因拔棄漢中遂徙武  
都之種於秦川欲以弱寇強國扞禦蜀人此蓋權宜之  
計一時之勢非所以為萬世之利也今者當之已受其

弊矣夫關中土沃物豐厥田上上加以涇渭之流溉其  
陂鹵鄭國白渠灌浸相通黍稷之饒畝號一鍾百姓謠  
詠其殷實帝王之都每以為居未聞戎狄宜在此土也  
非我族類其心必異戎狄志能不與華同而因其衰弊  
遷之畿服士庶翫習侮其輕弱使其怨恨之氣毒於骨  
髓至於蕃育衆盛則坐生其心以貪悍之性挾憤怒之  
情候隙乘便輒為橫逆而居封域之內無障塞之隔掩  
不備之人收散野之積故能為禍滋蔓暴害不測此必



然之勢已驗之事也當今之宜宜及兵威方盛衆事未  
罷徙馮翊北地新平安定界內諸羌著先零罕开析支之  
地徙扶風始平京兆之氏出還隴右著陰平武都之界  
廩其道路之糧令足自致各附本種反其舊土使屬國  
撫夷就安集之戎晉不雜並得其所上合往古即叙之  
義下為盛世永久之規縱有猾夏之心風塵之警則絕  
遠中國隔閼山河雖為寇暴所害不廣是以充國子明  
能以數萬之衆制羣羌之命有征無戰全軍獨克雖有

謀謨深計廟勝遠圖豈不以華夷異處戎夏區別要塞  
易守之故得成其功也哉難者曰方今關中之禍暴兵  
二載征戍之勞老師十萬水旱之害薦饑累荒疫癘之  
災札瘥夭昏凶逆既戮悔惡初附且款且畏咸懷危懼  
百姓愁苦異人同慮望寧息之有期若枯旱之思雨露  
誠宜鎮之以安豫而子方欲作役起徒興功造事使疲  
悴之衆徙自猜之寇以無穀之人遷乏食之虜恐勢盡  
力屈緒業不卒羌戎離散心不可一前害未及弭而後

變復橫出矣答曰羌戎狡猾擅相號署攻城野戰傷害  
牧守連兵聚衆載離寒暑矣而今異類瓦解同種土崩  
老幼繫擄丁壯降散蕩居離析不能相一子以此等為  
尚挾餘資悔惡反善懷我德惠而來柔附乎將勢窮道  
盡智力俱困懼我兵誅以至於此乎曰無有餘力勢窮  
道盡故也然則我能制其短長之命而令其進退由已矣  
夫樂其業者不易事安其居者無遷志方其自疑危懼  
畏怖促遽故可制以兵威使之左右無違也迨其死亡

散流離過未鳩與關中之人戶皆為讐故可遐遷遠處  
令其心不懷土也夫聖賢之謀事也為之于未有理之  
于未亂道不著而平德不顯而成其次則能轉禍為福因  
敗為功恤困必濟遇否能通今子遭變事之終而不圖更  
制之始愛易輒之勤而得覆車之軌何哉且關中之人  
百餘萬口率其少多戎狄居半處之與遷必須口實若  
有窮乏糝粒不繼者故當傾關中之穀以全其生生之  
計必無擠于溝壑而不為侵掠之害也今我遷之傳食

而至附其種族自使相贍而秦地之人得其半穀此為  
濟行者以廩糧遺居者以積倉寬闕中之逼去盜賊之  
原除旦夕之損建終年之益若憚暫舉之小勞而忘永  
逸之弘策惜日月之煩苦而遺累世之寇敵非所謂能  
開物成務創業垂統崇基拓迹謀及子孫者也

三良論

唐  
李德裕

秦穆之殺三良詩人刺之矣春秋譏之矣今不復議惟  
三良許之以死而前代無議何也且臣道莫顯於咎繇

孝友莫盛於周公咎繇尚不殉於舜禹二后周公尚不殉於文武二王三良詎可許之死乎如三良者所謂殉榮樂也非所謂殉仁義也可與梁丘據安陵君同譏矣焉得謂之百夫特哉昔荀息許晉獻言繼之以死君子尤歎斯言之玷不可為也況得以生同榮樂死共埃塵以為忠乎晏平仲言君為社稷死則死之斯言得之矣自周漢迄於巨唐殺身成仁代有髦傑莫不顯一身之義烈未有繫一國之存亡唯紀信乘黃屋以誑楚赴丹焰

而存漢數千年間一人而已漢祚四百由此而興余謂漢祖封建紀氏宜在蕭曹之上報德未稱良可悲也

### 秦論

宋何去非

兵有攻有守善為兵者必知夫攻守之所宜故以攻則克以守則固當攻而守當守而攻均敗之道也方天下交臂相與而事秦之彊也秦人出甲以攻諸侯蓋將取之也圖攻以取人之國者所謂鯨敵之師也及天下攘袂相率而叛秦之亂也秦人合卒以拒諸侯蓋將却之

也圖拒以却人之兵者所謂救敗之師也兼敵之師利於轉戰救敗之師利於固守兵之常勢也秦人據殽函之阻以臨山東自穆公以來常雄諸侯卒至於并天下而王之豈其君世賢耶亦以得乎形便之居故也二世之亂天下相與起而亡秦不三歲而為墟以二世之不道顧秦亦何足以亡然而使其知捐背叛之山東嚴兵拒關為自救之計雖以無道行之而山西千里之區猶可歲月保也不知慮此乃空國之師以屬章邯李由之



徒越關千里以搏寇而為鄉日堂堂兼敵之師亦已悖  
矣方陳勝之首事而天下豪傑爭西嚮而誅秦也蓋振臂  
一呼而帶甲者百萬舉麾一號而下城者數十又人皆  
山林崛起之匹夫其存亡勝負之機取決於一戰其鋒  
至銳也而章邯之徒不知固守其所以老其師乃提孤  
軍棄天險渡漳踰洛左馳右驚以嬰四合之鋒卒致于  
敗而沛公之衆揚袖而入空關雖二世之亂足以覆宗  
天下之勢足以夷秦而其亡遂至於如此之亟者用兵

之罪也夫秦役其民以從事於天下之日久矣而其民  
被二世之毒未深其勇於公鬪樂於衛上之風聲氣俗  
猶在也而章邯之為兵也以攻則不足以守則有餘周  
文常率百萬之師搏于戲下矣章邯三擊而三走之卒  
殺周文使其不遂縱以搏敵而坐關固守為救敗之師  
關東之士雖已分裂而全秦未潰也或曰七國之反漢  
也議者歸罪於吳楚以為不知杜成臯之口而漢將一  
日過成臯者數十輩遂至於敗亡今豪傑之叛秦而罪

二世之越關搏戰何也嗟夫務論兵者不論其逆順之情與夫利害之勢則為兵亦疎矣夫秦有可亡之形而天下之衆亦銳於亡秦是以豪傑之起者因民志也關東非為秦役矣漢無可叛之釁而天下之民無志於負漢則七國之起非民志矣天下皆為漢役者也以不為秦役之關東則二世安得即其地而疾戰其民以方為漢役之天下則漢安得不趨其所而疾誅其君此戰守之所以異術也昔者賈誼司馬遷皆謂使子嬰有庸主

之才僅得中佐則山西之地可全而有卒取失言之譏  
於後世彼二子者固非宜於事機者也亦惜夫秦有可  
全之勢耳雖然彼徒有可全之勢而不知至於子嬰而  
秦之事去矣雖有太公之佐其如秦何哉

坑冶論

明 任慶雲

坑冶周官圻人掌金玉錫石之地而為之厲禁以守之  
若必將取之則物其地而授之巡其禁令唐德宗時戶  
部侍郎韓洄建議山澤之利宜歸王者由是隸鹽錢使

開成間復以山澤之利歸於州縣刺史選吏主之其後諸州牟利以自殖天下不過七萬緡不能當一縣之茶稅宋興金銀銅鐵鉛錫之貨凡諸產金地有五曰商饒歙撫南安產水銀地有四曰秦商階鳳產硃砂地有三曰商宜富順而商皆居其一太祖三年詔曰古者不貴難得之貨後代始及山澤上加侵削下益抗蔽每念茲事深疾於懷未能捐金于山豈忍奪民之利宜減三分之一太宗至道二年有司言秦商鳳階諸山內出銅卅

定州諸山出銀礦宜設官署掌其事上曰地不愛寶當與衆庶共之不許皇祐中中書備對礦冶之數商州額貢金三十九兩至神宗熙寧元年詔天下寶貨坑冶不發而負歲課者蠲之四年以商州所產微薄詔罷貢金夫以天地自然之利顯畀坑冶如雲南之大理浙江之處州山西之孟縣諸處十礦九銀賦之有定額課亦易辦有益於民而無損於治故曰利者義之和也奈何後世爭奪積成蠹敝檢踏之吏從而殃民有力之家悉務

辭遜致坑源廢絕礦條湮閉間有出備工本為官開後  
元佃之家方施工用財未享其利而譁徒交脅甚至黥  
配佑籍寃無以訴此坑冶所以失陷也商州地近三輔  
產礦之名易著自昔歲額之貢率至逋負所產微細少  
則必爭爭則羣起而為盜故開則未見其利而為害滋  
甚至厖九重專官以禁治之而害猶未已也商州等五  
州縣產金之地其盜在鎮安者易發易捕蓋有藩臬以  
統御之也在洛南者易發難捕如松朶山王家庵離縣

北不下百五十餘里去州又一百里遠難以制近寡難以制衆嵩盧竊礦之徒反密邇其界一呼而衆一二百人及商州察知齊緝兵夫勦之抗敵拒捕則已為時十數日矣彼處官民分隔兩省民方幸其得利官任之不禁主客之形異而利害頓殊吾商牽牛之厄方罹詰捕之擾也正德以來三次攻破州縣起於嵩盧嵩盧若在統制之下月有稽歲有考斤埃有驚職任有歸則礦竊之禍吾知免夫



風俗論

康海

夫天下之勢其所可見者常出庸人之所喜也庸人之所喜也故天下莫有強焉宋人貴雞豚而四境盡甯莖戎人尚酪乳而部落盡首宿觀諸庸人之所喜而天下之勢可見矣故國之治亂視風俗之淳漓風俗之淳漓視斯民之好尚夫邵以后稷開國其風俗淳然無偽也乃至於後尚鬪使氣不肯順理豪傑者至於把持治吏鄉人皆相推畏高之又習侈善享無豐歟之節日日擊

鼓聚會靡有厭飫好蕩之人得分銀尺布則置酒弗計  
蔬饌召倡優子女彈絃跕躑不辟長老時節遊衍女子  
率冶容妖服佔佔自見或又好爽快為賢多言習禮送  
死奢靡擬諸王侯壻莫婦翁至於傾產甚者禮佛飯僧  
謂有益於死者而於今不易也昏禮爭財至相構訟貧  
者入贅無異廝僕或又以女易女謂之換親而騰說是  
非多至離異父或愛子私為營產身死未寒兄弟魚肉  
不蕩貲廢業不已也嗚呼今之關中猶古之關中也而

今之民俗非古之民俗也然則從而新之豈不由於上作哉

過秦論

楊慎

有問於楊子曰孟子有言不仁而得天下者未之有也秦以不仁而得天下矣孟子之言其不驗乎曰秦自孝公用商鞅富強之術而關中之力雄自惠文用張儀離橫之謀而諸侯之勢弱自昭襄用范雎遠交近攻之策而規取天下之計得至李斯兼併之說用天下皆秦矣

然為臣者功成而身喪為君者業成而國亡其強也斯所以為弱其智也斯所以為愚嗚呼悲夫秦自始皇二十六年庚辰六王初畢四海始一雄圖既溢武力未畢方架黿鼉以為梁巡海右以送日俄而祖龍魂斷於沙丘鮑魚腥聞乎四極矣胡亥越十七兄而篡立方欲極耳目窮心志而閤樂之戈已及於望夷矣子嬰討賊方平肉未及下咽酒未及濡脣親朋未及盡相勞而赤帝真人已翔乎灞上矣計始皇之餘分閏位僅十二年胡亥

僅二年子嬰僅四十六日不啻石火之一敲電光之一  
瞥吹劍之一呖左蝸之一戰南槐之一夢也須臾之在  
億千稊米之於大塊實似之雖得猶不得也孔子曰雖  
得之必失之秦之謂矣以孟子之言合孔子之言觀之  
聖賢之論卓乎不可無何嘗不驗乎哉

愛蘇亭說

陳斐

扶風城南數武有山曰飛鳳山之上有亭舊題曰遠愛  
相傳蘇長公軾之所書今不存余曰山去城里許非遠

也山之亭仰面即可見舉足即可登可愛甚近也而名曰遠愛者長公之寄興於遠耳余更題為愛蘇亭昔蘇公之所愛者山亭也今人之所以愛此山亭者以曾經蘇公之所愛也山亭經蘇公之所愛而山之可愛益增是今人之所以愛此山亭者實愛蘇公也更名愛蘇誰曰不宜雖然陳子既愛蘇公之所愛其繼而來者又焉知無愛陳子之所愛者乎愛陳子之所愛即愛蘇公之愛而愛蘇公之說益明矣因為愛蘇亭說

杜甫川說

張廷玉

晉顧愷之遊會稽人問山水之美答曰千巖競秀萬壑  
爭流而山川覽勝輒見于詩歌宜莫如杜工部甫人謂  
不由萬里路不讀萬卷書不可解杜則自襄陽徙河南  
洎避亂廊坊卜居成都繇梓州下峽至荆南居耒陽不  
啻萬里遊關以北為延州山競峨眉川流燕尾聯嵐含  
暉稱邊境之腹裏一勝槩故嘉嶺山自范仲淹知延州  
得名杜甫川以子美避亂一過士人至今日呼之弟子

美所過不能無詩今考甫集六十卷及秘府舊藏人家  
所有大小集無至延州詩何邪子美自白水攜家客居  
三川觀水漲十二韵題短崖石室有長天夜散千山月  
遠水霞收萬里雲句今其字跡尚存比在鄜州有蘇端  
薛復筵簡薛華歌有贈高式顏有彭衙行有得舍弟消  
息有月夜有遣興為家鄜州洛交羌村有憶驥子有一  
百五日對夜月至鳳翔謁肅宗復歸羌村有晚行口號  
有過宜君玉華宮有北征有獨步歸行有羌村三首有



塞蘆子夫三川邠州羌村皆延屬皆有詩北去延有幾  
胡以杜甫名川而無詩未至胡以杜甫也既至胡以杜  
甫川不杜甫詩也彭衙行曰少留同家窪欲出蘆子關  
塞蘆子曰延州秦北戶曰蘆關扼兩寇今按夢弼云延  
州乃秦北門去州百八十有里門山或云蘆子蓋兩山  
峙立如門形若葫蘆由此而觀今郡北蘆關嶺即蘆子  
關彼地險阻可守子美且稔知之而延州猶經歷未到  
邪延州其所必至而川杜甫詩不杜甫非延于甫有情

甫于川無情有情莫如茲川詩其佚之也三百篇如由  
庚南陔等什所佚多矣嗚呼此一川流悠悠漠漠似有  
德君子所必觀焉而川西去未三十里地名花原頭其  
山高五里從廣二十里千餘年來土人種牡丹幾徧至  
採為薪故名花原得譜牡丹為延州紅使子美至此川  
而過花原當必有詩乃不得與萬里草堂百花爭妍猥  
與海棠寂寞也有遺憾哉黃四娘家花滿蹊千古流傳  
延之花原種牡丹者為誰又不得比于黃四娘苔蹊胡

元任不有言乎齊魯大臣二人而史失其名黃四娘者  
獨何人哉託此詩以得不朽世間幸不幸類如此

終南太白說

劉紹周

終南山橫亘關中南面起秦隴徹藍田凡雍岐郿鄠長  
安萬年遠且八百里而延袤峙踞其南者皆此一山也  
故韓愈南山詩曰西南雄太白突起莫間遶藩都配德  
運分宅占丁戊逍遙越坤位詆訐陷乾竇如關中記謂終  
南山之總名太乙山之別號此其例也水經註武功終

南引杜預為據而曰此山亦名中南亦名太白其曰終南固無間乎武功與萬年至云太白則舊隸武功為冬夏積雪望之皓然故名雍錄謂古圖志無言太白即太乙者惟長安志萬年炭谷有太乙祠始可命為太乙而非武功之太白則古文以終南為太乙者殆誤認武功太白而莫或正之耳其山高大出物產夏書曰終南惇物秦詩曰終南何有有條有梅惇厚也厚物者即東方朔所謂玉石金銀銅鐵豫章檀栢百王可以取給萬民

可仰足者也是自堯禹周漢皆謂終南饒物產不當別  
有一山自名厚物班志引古文而以太乙為終南垂山  
為厚物也誤矣蓋以太乙太白為終南則可而分太乙  
太白終南為三則不可故李吉甫在元和間核關中終  
南所歷而著諸郡縣自郿鄠武功至長安萬年皆著終  
南且曰在某縣某方幾里則太白專屬縣境太乙專屬  
萬年而南山在關中者統名曰終南云

褒斜同谷說

前人

古今志褒斜者皆謂南北同谷惟何氏雍大記不然謂自秦入蜀有三谷四道西南曰褒谷南曰駱谷從洋入東南曰斜谷從郿入其棧道有四出從成和階文出者為沓中陰平道鄧艾伐蜀由之從兩當出者為故道漢高帝攻陳倉由之從褒鳳出者為今連雲棧道漢王之南鄭由之從成固洋縣出者為斜駱道武侯屯渭上由之此四道三谷余未履其地但就其所分疏求之夫既以駱谷為南則斜谷當在西南且斜駱二谷地望各異

何得槩稱一道為武侯屯渭所經由耶蓋褒谷在蜀漢西北不得為自秦入蜀之路若從秦川言則南曰駱谷在盤屋西南為郿則斜谷耳乃訛西南曰東南將以郿在盤屋之東乎哉故程大昌述高帝之入關也正月羽封沛公為漢王都南鄭封秦將章邯為雍王都廢丘四月漢王入蝕中至南鄭蝕中不見他書以地望言關中南面礙山不可直達其有微徑可達漢中者惟子午關在長安南次西有駱谷關又西則褒斜也此蝕中非駱

谷則子午耳若大散則在西南不與咸陽對出非其地矣其年五月漢王引兵襲雍則自褒斜出蓋雍之陳倉也漢兵既出章邯走廢丘遂定雍縣東圍廢丘邯自殺復遣樊噲周勃引兵下郿安得謂駱谷在南而斜谷又在東耶又按鄭氏地理畧當蜀魏時陳倉東北十五里為郿城亮攻陳倉不拔又攻郿不能克乃引還國志雖無其文而漁仲博雅必有所本則高帝後亮亦攻陳倉及郿而不獨屯渭上由斜駱道矣蓋駱谷出扶風隔南



山中有三嶺一曰沈嶺近芒水在盤屋一曰衙嶺一曰分水嶺固郿斜谷水所從出以入渭者也乃知斜駱二谷在南山中其脉勢實相聯接緣本著末則郿與盤屋皆有駱谷而雍大記乃統稱斜駱道云所以記事者又有元僖西幸由斜谷之說見次柳氏舊聞及張氏耆舊傳

昭陵乾陵說

范文光

文光居邠嘗走長安道過谷口問太宗祠人不識為太

宗也漫應曰唐王祠即今昭陵人亦應之曰唐王陵私心怪之以為帝也何王之有然過奉天問乾陵人亦不知有高宗也亦應之曰武則天陵范子曰光令而後知小民之口勝史氏之筆多矣太宗雖帝要其功業著於為王時當隋季之亂出之膏火震以風雷一時奉唐家者獨此王耳故至今王之也實當年有以傳此名也然則人心所屬衆譽所歸雖帝王位號赫著人間斯民固有不從其尊者矣若夫金輪氏淫毒竊攘使異世下一

坏之土且專其名君子聽之猶有禍心之惡焉然高宗  
實不能夫特稱之曰則天陵所以愧後世之夫不能有  
其妻者雖掘地及泉骨可埋而名不許嘻其甚矣考亭  
涑水大儒秉筆然定不敢易帝而王去帝而后而小民  
直與之直奪之百世千秋萬人一舌先正謂春秋史外  
傳心豈知史外傳口民言可畏過者思之

潼關連城說

楊端本

昔人謂泥丸東封函谷關今日之潼關鎖鑰西秦謂即

古之函谷者非耶然入關有三道潼入關之正道也商之武關入關之孔道也昔漢祖破秦由此入咸陽朝邑古臨晉地自夏陽至關平曠百里大河易渡漢祖往來關中嘗由臨晉而七國謀反亦欲兵由此入是又入關之隙道也五泉先生云一方不戒三險俱失誠哉是言也然武關萬山險阻一將偏師可以無虞朝邑雖曰平曠百里命將建營於中路設巨礮數十南北巡守則大河即天塹也至潼關之守則禁坑最為要地昔黃巢從

禁坑破關明逆闖李自成亦由禁坑陷關豈非一方不  
戒而失三險之明驗乎蓋疎忽地理之要而十二連城  
之廢也古設十二連城於禁溝之西由南郊以抵山麓  
計三十里而十二城是三里一城也每城設兵百人而  
於中城益其兵多設火器矢弩連絡呼應疾若風雨即  
有百萬之衆豈能超越而飛渡耶故守關而不守禁溝  
者守猶勿守也守禁溝而不建十二連城者守猶未善  
也是猶一室之內杜門塞竇以妨鳥雀之入而忘閉其

牖也是以關予敵非所以固圉也守關者察地理之形勢謀封疆之萬全周歷山川曠覽古昔鑒觀成敗其於建連城以控禁溝控禁溝以固關亦計謀而重慮之乎

太華仙掌辨

唐王涯

西嶽太華華之首峰有五崖比壑破巖而列自下遠而望之偶為掌形舊俗土記之傳者皆曰昔河自積石出而東流既越龍門遂彌南馳者千數百里折波左旋將走東溟連山寨之壅不得去有巨靈於此力擘而剖其

中跖而北者為首陽絕而南者為太華河自此洩茫洋  
下馳故其掌跡猶存巨靈之跡也余聞而惑之乃往觀  
曰誕哉此說乎夫所謂神者非人也其動無聲其形無  
跡若形而無象若氣而無色拔山剖澤而不見其作鼓  
風奔水而不見其力視不可察名不能及故推而謂  
之神苟有聲可聞形可見非神之所為則皆人力之能  
及也烏有神之作力而有人跡乎且夫高天厚地聳山  
流川者神之所為也所言開山導河亦神也神之所以

神者有作而無恃一成而不易烏有始塞而復達之始連而復絕之始不知終是不為神矣且此靈之運為何古乎在太初開闢之始乎為陶唐洪水懷山襄陵之際乎以為開闢之始也宜當胚渾之先天地未位萬象茫昧尚無定歸當止一河之壅抑而一靈與其道借有其事自為而著悠悠乎年代之眇沒其誰也克傳以為陶唐洪水之際乎則禹奠百川宜在禹貢乃曰導河積石至於龍門南至於華陰東至於底柱皆禹功之所致以



達於海豈天地大異之若此而典記不以為文哉天設  
四瀆宜有以通不當始遏其流滯撓其和氣及其汨亂  
而後理也且山谷之作此形何則不有危險相薄高深  
相敵乃有銳而出者為虎牙偶而背者為熊耳角而巘  
者為牛首冠而峭者為雞頭必以形之類形而必加說  
則雞牛熊虎之象其亦有作乎余嘗覽張平子賦西京  
至巨靈高掌厥跡猶存之辭以為該聞精達常以是惑  
使不語怪神之旨何所述明暨覩其形而咨之果謬悠

而無據也將假文神事以飾其辭與為思而有闕與因辯其由而述之以告山下

四皓辨

宋羅泌

揚雄云美行園公綺里季夏黃公角里先生代之所謂四皓者園公一綺里季二夏黃公三角里先生四也遭秦苛政避地商之藍田山中漢高招之以皇帝善嫚士不至迨帝為戚姬故欲易太子高后以留侯計致之太子以定四老人之力也既去弗復見後俱葬于安陵太

白所謂蕪沒四墳連者百姓義而祠之今京兆藍田軹  
及上洛商東巔俱有祠廟或云為秦博士世亂乃隱故  
園稱陳留風俗傳云園公為秦博士避地南山漢祖之  
起禮聘不就惠帝立以為司徒園公者園公也其本園  
姓而崔氏所贊亦謂四皓為秦博士然質之傳四皓當  
秦在時已入商洛深山不見其為博士且漢世無司徒  
元壽二年始制大司徒公亦何自為之此稱謬也雖然  
四皓之名言者不一如園公在史記以來漢書法言諸

所記載俱作園公洽聞記作郭園公贊與仙傳拾遺又  
以為東園公角里先生在孔安國秘記及漢紀仙傳作  
角蠡而魏子作祿里是特音相假耳至綺里季之與夏  
黃公則畢文簡特以綺里季夏為一黃公為一蓋以逸  
少淵明子美有黃綺之語非也按仙傳拾遺云綺里季  
東園公角里先生夏黃公與張良為雲霞之友間二子  
而言之而夏黃公在崔氏譜老子中經皆謂之夏里黃  
公則不得云綺里季夏矣又元和姓纂亦有夏里綺里

祿里三姓夏里云出四皓河內軹人則文簡之說正為失之往歲商於人有得四皓神胙机者乃有綺里季與角里之神坐則夏黃公之自為名益可知也神胙刻更有圉公神坐及圉公神坐机字正作圉而顏師古正俗引圉稱之自叙亦云圉公之後則知圉之為正抑復考之四皓姓諱有大異者在陳留志則圉公名庚而字宣明襄邑人始居圉中因號圉公或云姓國名秉與軹人角里先生綺里季夏里黃公為友秉庚字轉是亦稱圉

公爾故風俗通云四皓園公本亦園者夏里黃公姓崔  
名廓字少通齊人隱居夏里爰號夏里黃公姓崔氏而  
角里先生則後泰伯之後姓周名術字元道京師謂之  
霸上先生角里亦其號爾淵明亦嘗引此則非不知黃  
綺之實者四皓之刻始見於黃伯思董道繼見隸纂為  
不誤也三輔舊事云惠帝為四皓作碑於隱所則知神  
昨机俱當時所刻者或云園公姓韋韋口聲也國口意

也殆廋辭云

風俗通云園援也從國袁聲今市語韋氏為園家

武功郃鄠辨

明 劉紹周

鄠為武功地有斜谷水太白山余綜其實不然按元和志鄠在渭水南為漢鄠縣地西南二十里有故鄠城有后稷姜嫄祠羅泌路史亦云考五代都雍總圖其說以渭為經歷秦水大散陳倉至武功受斜谷水東為鄠縣又東逕雍雍今府治也其鄠平陽鄠俱傍渭水南而北與雍岐周相直然漢地理志右扶風有鄠鄠武功各為縣鄠下註周后稷所封鄠下註有成國渠為右輔都尉

治武功有太乙山垂山皆在縣東惟斜谷水出衙嶺山  
北至鄠入渭有斜水祠不言武功即郿為后稷封域而  
唐志以郿為鄠縣地水經註武侯駐鄠使孟琰據武功  
水東唐書地理志及胡氏三省註溫公通鑑俱謂鄠有  
東西原為武侯所據地則知縣東南有太白山又南為  
武功山此山之水則為武功水經流縣境今失其稱名  
定處耳故地理家但括全境以鄠即武功并有其山水  
云至漢永平八年始自渭水南徙武功於故郿城尚在



今縣東北四十八里與唐志路史合惟隋徙武功於中  
亭川則距今治遠七十里頗不干涉矣鄭樵述地理畧  
謂渭水東過隴州汧源受汧水又東過鳳翔郿縣受斜  
谷水并太白山皆在今縣境內故康太史志武功謂武  
功太白兩山斜谷水屬郿若據今武功縣以言郿郿并  
欲求所謂武功太白山及斜谷水何從得焉則知世以  
郿為武功者蓋據古地望而非可繫於今也

平陽封域辨

前人

按魏書地形志太平真君六平分雍置周城隸平秦改  
鄠曰平陽隸武都武都者號也與鄠平陽同域者也史  
記秦寧公徙平陽世紀曰鄠之平陽亭徐廣曰鄠有平  
陽鄉故通鑑前編本經世書直作寧公徙鄠是也乃括  
地志云平陽故城在岐山西四十六里為寧公徙都處  
有平陽鄉有平陽聚胡氏註岐山縣亦云武德七年移  
治龍尾城在平陽故城東北凡兩見則何也按都雍圖  
說瀕渭水南自西而東由鄠及平陽始及漢鄠縣地直

北則為雍與岐周又按秦都世次自周東遷始有岐西  
或官邑在鄠或徙居平陽或居封宮卒葬平陽皆此一  
地也至德公復徙居雍則平陽在今縣境西濱渭當岐  
西南此與或言武公葬宣陽聚東南者合而雍又越渭  
在平陽周城西北矣胡氏註通鑑於元載請割鄠號稱  
後魏於鄠置平陽周城二縣西魏復改平陽為鄠城後  
周廢鄠入周城蓋周城界雍鄠間可以言分雍置周城  
亦可言於鄠置周城平陽也則括地志以平陽在岐山

西蓋魏王泰正就武德七年後言之與魏志胡註未始相悖獨雍錄收秦雜宮以平陽封宮屬華山下則隔越六七百里斯為不審的耳大昌新安人其所述雍錄如以郃在平陽西北類多不可據

雍韓考

張士佩

韓何昉乎昉於周左氏傳曰邾晉應韓武之穆也而史伯亦云應韓武王之子宣王時賢其裔而禮之故尹吉甫有韓奕之詩焉其一章曰奕奕梁山維禹甸之有倬

其道韓侯受命王親命之纘戎祖考無廢朕命夙夜匪懈虔共爾位朕命不易幹不庭方以佐戎辟其二章曰四牡奕奕孔脩且張韓侯入覲以其介圭入覲于王王錫韓侯淑旂綏章簞第錯衡元袞赤舄鉤膺鏤錫鞞鞫淺幘脩革金厄其三章曰韓侯出祖出宿于屠顯父餞之清酒百壺其殽維何魚鼈鮮魚其藋維何維筍及蒲其贈維何乘馬路車邁豆有且侯氏燕胥其四章曰韓侯取妻汾王之甥蹶父之子韓侯迎止于蹶之里百兩

彭彭八鸞鏘鏘不顯其光諸娣從之祁祁如雲韓侯顧之爛其盈門其五章曰蹶父孔武靡國不到為韓姑相攸莫如韓樂孔樂韓土川澤訐訐魴鱖甫甫麀鹿嘒嘒有熊有羆有貓有虎慶既令居韓姑燕譽其六章曰溥彼韓城燕師所完以先祖受命因時百蠻王錫韓侯其追其貊奄受北國因以其伯實墉實壑實畝實籍獻其貆皮赤豹黃羆繹斯詩也韓蓋侯伯之國也及大夫韓武子萬食采于韓原乃為邑武子後獻子厥從封姓為韓

氏是為韓厥獻子後宣子徙居州州蘇忿生之州邑也  
宣子後貞子徙居平陽貞子後康子與趙襄子魏桓子  
共敗知伯分其地益大大於諸侯康子後景侯立六  
年與趙魏俱得列為諸侯列侯後哀侯立元年與趙魏  
分晉國二年滅鄭因徙都鄭韓分晉得南陽郡及潁州之  
父城定陵襄城潁陽潁陰長社陽翟郟東接汝南西接  
弘農得新安宜陽及陳鄭之國而初所食采之邑曰韓  
原者乃為魏分焉魏之分也界自高陵以東盡河東河

內南有陳留汝南及開封而開封中原地號大梁而韓  
原時曰少梁蓋以界秦戍守重之也韓原有龍門龍門  
雍州之域也直鄭則豫州之域也豫之韓大國也人多  
知之雍之韓始則國而終則邑也人鮮察焉故余稽諸  
經傳悉為著之俾地各昭昭免夫混淆之用也

幽谷考

文翔鳳

不窋自郃竄戎翟之間為慶州寧州於南北朝為邠州  
公劉城在州西大似所謂京高丘者但弗入幽谷之隩



而塚固在邠州三水之間矣宜其國為近朱子詩傳幽  
在三水按篤公劉一詩其山川全合陟則在巘則石門  
即幽山幽山名亦水名也而寧幽間更無他巘所謂降  
而在原者信謂此逝彼百泉則諸隰谷之原泉不啻百  
又奚以三川之細而名之南岡則邑翠屏巖也半川殆  
其立國之野所謂京而邑之川即師水是謂京山師水  
地中有水曰師幽雖九谷之總名而其建國之大川宜  
顯稱幽水九原槩壁數百尺而水伏其地中師象也所

謂土厚水深者正謂此北山北耳皇澗即唐川之訛也  
可夾而居者也過澗即炭泉訛也梁渠源於半川之後  
而其下流為炭泉獨南轉而過其國宜為過澗炭泉之  
名見丹淵集可溯不可夾也唐以南邠州為邠州其以  
州左右小溪當二澗者誤高辛氏不都豳奈何邠城而有  
篤生后稷之隘巷蓋衝郵之吏飾而表之以重地而亦  
弗問邠邠之不相涉邠州蓋所謂度其夕陽者詩稱涉  
渭不稱涇豈其國於涇之畔而曾弗之齒耶同官有漆

至耀州而合沮又安知所祠哭秦之姜女不即爰及姜女之訛乎而淳化之姜嫄亦當為太姜之里蓋謂太姜實源於此耳其以為姜嫄者亦誣蓋史之以嫄代源而表飾之以重地者也永壽為唐漆縣求其漆而弗得近始詢得于九峻之陰細甚又不當率西之道其建邑蓋誤以率西之許為漆沮而遂以名而吏又因縣以飾實之亦豈果有兩漆沮如雍錄諸說謂詩書不相協乎書稱涇屬渭汭漆沮既從同耀之水實入渭而清碧如漆

也詩止云率西澣不言漆奈何強而傳之其云自土沮漆亦非謂幽隩果在沮漆間蓋道其遐僻之界而陶復固自在谷中也乃為善說詩西澣蓋即今大峪底窖諸水而必以為率漆沮而西也宜其裂詩書而二之寧州真寧蓋北幽幽之脉淳化蓋南幽幽之腓同官耀州蓋東幽邠州永壽蓋西幽幽之腋三水蓋中幽幽之腹而寧州真寧三水皆立幽谷中谷九而原隰錯故謂之幽淳化往即三水縣宋始自為淳化縣元始併入淳化而我

朝始各自為縣也自寧州城以北原即直北而淳化城以  
南川即直南無所為艮山坤水者不為豳同耀邠永并  
在九谷外則一經一緯之豳吾邑實據其隩區矣班  
叔皮之自長都之安定也北征賦所謂邠邠邑鄉者吾  
邑也杜少陵之自鳳翔之鄜延也北征詩所謂木末水  
濱者吾邑也許氏不諳地而以汭水歸之扶風縣是以  
豳為岐也汭蓋豳邠同而水表之豳字兩豕分附山者  
豕水象也分附者子午嶺分水以東西也邠蓋八字分

而西立邑於其水際故邠目之也凡分則象八分從八從刀故自分水嶺以西則為邠也是邠之為言文也亦分也分陰分陽而後可錯以成文九谷分壤地而為原隰故分文之兩義兼也八蓋外八而中一之象此九原九隰之所以為幽為邠也

華嶽題名跋

宋

歐陽修

華嶽題名自唐開元二十三年訖後唐清泰二年實二百一年題名者五百一人再題者又三十三人錄為十

卷往往當時知名士也或兄弟同遊或子姪並侍或僚屬將佐之咸在或山人處士之相攜或奉使奔命有行役之勞或窮高望遠極登臨之適其富貴貧賤歡樂憂悲非惟人事百端而亦世變多故開元二十三年歲在丙午是歲天子耕藉田賜大赦羣臣方頌太平請封禪盖有唐極盛之時也清泰二年歲在乙未廢帝篡立之明年也是歲石敬瑭以太原反召契丹入自鴈門廢帝自焚於洛陽而晉高祖入自太原五代極亂之時也始

終二百年間或治或亂或盛或衰而往者來者先者後者雖窮達壽夭參差不齊而斯五百人者卒歸於共盡也其姓名歲月風霜剝裂亦或在或亡其存者有千仞之山石爾故特錄其題刻每撫卷慨然何異臨長川而歎逝者也

同州題顏魯公祠像

唐重

重既摹公之像於蒲繪而祠之又訪得此石本狀貌老矣公以乾元元年自同徙蒲至奉使時垂三十年氣節



不衰而狀貌非昔也乃刻石而寘於祠室俾觀者有考焉

鄉射禮直節序例

明何景明

予視學漢中至金州集漢陰平利紫陽四學師生將行射焉問其禮不知也乃使學官草具其儀予稍稍為說其文辭義意畧去恢復輯其節理實近可行者為之先屬范推官紳肄於東城之圃而予與呂憲使克中往觀焉憲使曰予在漢中蓋修其器矣未究其禮也謂紳曰

其悉布茲景明日語曰禮失而求之野古禮亡不可見者何可勝道哉然鄉射之禮學校尚或習之子由鄆郡抵鳳漢攷之於學既已無聞而有司並其器亡之往往督使旋修舉行之斑白之老有相與環堵駭視者矣嗟夫古人揖坐旋辟之容與夫修於其鄉而一日不可缺者至使人以為曠世聞見之事風俗於古豈不邈哉

題王安道遊華山圖

王世貞

遊太華山者往往至青柯坪而止至韓退之登其巔不

能下慟哭與家訣其語聞於人人而仙掌蓮花間永絕  
縉紳先生之跡僅為樵子牧豎所有洪武中吾州王履  
安道獨能以知命之歲挾策冒險凌絕頂探幽宅與羽  
人靜姝問答歸而筆之記若詩又能託之畫而天外三  
峰高竒曠輿之勝盡矣畫冊凡四十絕得馬夏風格天  
骨適爽書法亦純雅可愛安道沒歸之里人武氏而失  
其四後於長干酒肆見之宛然延津之合也傾橐金購  
歸為武家雅語垂二百年而吾友人李憲使攀龍復能

登其巔所至書吾姓名於石而吾又託友人王叅政道  
行刻石蓮花峰今年夏復從武侯所借觀安道畫冊及  
詩記磅礴累日太華既兩有吾名姓而吾胸中又具一  
太華矣是何必減三君子耶為大粲笑識其末

書遊南山詩卷後

馬理

終南故周都之山也其美冠天下今在盤屋予居北山  
之陽相距甫百里乃不得一至焉往歲漢陂王子潁西  
康子約予同遊予時病卧復不能獲如約徒翹首南望

詠殷雷之章歌斯干之篇而已邇者信陽何子試士過  
盤屋適我關中二三君子尋盟終南乃不期而集於是  
相與陟崇覽勝暢情於杯酌之間興感於俯仰之際於  
是一唱一和得詩凡若干篇亦嘉會也予時在都下又  
不及與他日歸年友王子明叔寄詩於予且謂當有言  
其上予展卷而讀之恍若履高峰之巔南眺漢川北瞰  
秦隴左峨嶠右太行隨目之所如而呈奇獻秀錯乎其  
前亦一快矣然予不能無感焉竊惟西周盛時終南之

靈能使夫周召奏績鳳麟在野故詩人極詠之故二南  
二雅之樂不遺終南若樛木喬木著王化之美嘉魚有  
臺致得賢之樂騶虞靈臺辟雍極位育太平之盛是也  
故斯樂也薦諸宗廟朝廷之上以養性情育人材感天  
地格鬼神無弗通焉此終南之遇也及周之衰天方薦  
瘥而終南失靈詩人家父之徒咸怨焉於是正道廢邪  
說興而靈臺辟雍之墟化而為老氏授受之所此終南  
之不遇也自是以來佛氏者又往往據之斯又不遇也

間有賢人君子遊歌其間而采葛之情考槃之興居多  
要非雅南之盛則斯山遇之猶不遇也嗚呼終南其衰  
矣夫茲登臨諸君為人具瞻有終南之德適當我國家  
風化之美君臣交泰之際而嘉魚有臺之奏斯其時也  
則夫唱和之詩特其兆耳他日經正民興邪說不作雅  
南復殷薦之盛而終南當自有遇也誰謂其終衰矣夫  
誰謂其終衰矣夫

鎬鞦川圖跋

來復

右丞之於輞川盖神情大半寄之者也輞川之締構盛於一時繪而傳之者至流布千古而鹿苑滋峪之舊跡率淪沒于狐兔莽荻之間莫可尋覓關中所鐫圖又拙陋不堪摩娑往來憑弔者有對夕陽而咨嗟爾沈澤腴明府以博雅通儒來宰藍田政暇訪其遺槩清樽高詠若與右丞揖讓已則索不佞家藏郭忠恕所繪圖邀晉人郭漱六氏摹臨勒石精巧生動幾奪忠恕傳輞川之神令人想像右丞不可磨滅之風流也余惟繪此圖者



不知幾十百種而余家所藏似善蒞茲土者不知人代  
幾更而至沈明府之身始成此一段雅事名蹟名繪名  
賢名手賞集一時豈偶然乎

遊杏灣詩引

前人

杏花灣隸涇陽然距余邑十里距涇陽四十里地本名  
方南魯橋無今名今名余與友人同遊所命也土人種  
杏多至數千株春初花開遠近爛漫如張錦幄邑清河  
經其右稍上則渚隄灌田渠決五流周回樹下散輒復

合沿流皆杳過他木半蔽虧深窅目不能直覩故言灣  
也此地相傳久不知經幾劫豪富復廢為荒埜如劉希  
夷黃昏鳥飛之歎自余輩遊賞城中人漸一二繼其盛  
歲益與馬之跡肴觴之費土人始詫笑近亦多取醉花  
跼水涯矣居常言雖粧點花神不能無雕琢渾樸然仲  
長之禽魚許瑾之裊子猷之竹少陵之花溪襄陽之霸  
陵王裴之輞川韓孟之西郊觀其寓意托興似不直在  
耽宴樂恣吟眺間濫觴為之去之益遠曾覩貴客道絳

帽人張蓋穿游若俗子酣鬪橫折余輩亦歲成故事應  
接匆雜囊草多虛俱為花辱又賞者喜華土人利實樹  
大實稀合抱之林率成樵爨邇來景物已減什五矣至  
夫同遊之人間廁非侶酬和諸賢槩多散處每倒尊結  
伴伐木聽鶯之想頓起花時一大恨耳庚戌從燕抵家  
見王氏昆季詩知從華下迂道訪遊遂同社友含素舍  
弟馭仲即席成吟意興品識不卓然軼疇衆而遐追耶  
二君蓮洲先生嗣與太史先生嗣爾釐爾仲皆佳公子

也其季父信卿闕輔聞士與余善恨未來一遊異時亦  
訂約焉君家叔姪欲收我灣頭春色乎其以所有十丈  
蓮易之

樂城十景跋

陳繼儒

漢中左控三秦右跨西蜀中纏襄楚為關隴一大都會  
而斗山天柱挾褒斜之險瀉蟠冢之奇遂擅秦漢以來  
名勝第一往董宗伯玄宰以樂城十景諸什見示余亦  
續以巴吟輒惋怛終不得杖筇一履其畔新歲張侍御

奉命督學三吳儼然琅函之臨拜而歷視即疇昔玄宰  
與余賡歌樂城圖也層巒疊嶂繇亘映帶宜有偉人毓  
靈今侍御以斗岱間出之姿崇廣勵古文之治而於家  
鄉風景攜入几案時時披對李鄴侯為相而有煙霞之  
骨公之謂也余謂古來艷稱神異流傳遐禩者莫如岐  
陽石鼓出於周宣中興蒐獵之際此種奇古已不得不  
遜關中為最何況山谿林泉出於聞見之外一經名手  
指點恍然東坡與可復出乎

維風約題辭

馮從吾

孔子曰禮與其奢也寧儉夫由儉入奢易由奢入儉難  
秦中風俗雅稱近古乃今則奢極矣流波靡涯後將何  
極撫臺拱陽孫公憂之乃為維風約意在崇儉其有砥  
柱迴瀾之思乎夫奢費而儉省奢勞而儉逸喜省而惡  
費喜逸而惡勞人之常情乃竟由儉入奢何也彼蓋誤  
以奢為厚而以儉為薄以奢為敬而以儉為慢耳然喜  
厚而惡薄喜敬而惡慢又人之常情此所以由儉入奢

而無所底止也不知人之相與貴真不貴偽貴久不貴  
暫儉則真而可久其厚其敬孰大乎是彼奢則以套數  
相加以淫巧相競可暫而不可久是奢乃所以為薄為  
慢也而人奈何反以為厚為敬也知厚薄敬慢不在此  
則由奢入儉自不待辭之畢矣思深哉公之為此約也  
願與秦人士共守之或曰今天下風俗亦奢極矣寧止  
秦中子何私一秦而止與秦人士守之也與哉雖公之  
天下可也

書李將軍戰勝圖

左懋第

崇禎六年十有二月黃河冰堅賊擾鄉寧無食夜踏冰由船窩渡任家嶺者千人任家嶺韓城地也李將軍先遣裨將以百騎馳射賊賊亦還射傷相當將軍親以三百騎往射之賊大傷走余時騎往勞軍望黑旄頭立山嶺兵環高崖向河而陣至則偕將軍地上坐虎皮裯與語崖下即將軍射賊處也七年二月賊乃踏冰由老雞坡渡道河清川以南老雞坡河清川皆宜川地與韓界也



將軍恨之余亦恐宜維間饑民附賊多且難制將軍以健兒五百持十日糧日夜行百二十里至澄城界牛角相李得賊所在戰斬百六十級而還奪其掠婦女五十餘人各歸其家牛馬百以饗士余甚壯之將軍名英榆林衛人

己巳紀事詩題辭

王濤

己巳之變高陵僵尸橫野豺狼爭人骨而晝啼書生膽搖搖欲墮也乃其礪劍從軍死不旋踵怒氣薄豐隆英

魂繞列缺則有李亨秦光祖馬王顏可碎香魂不朽春  
花含其怨態秋雨咽其悲聲則有羅姚馬楊潘五烈婦  
投筆請纓破家享士章縫化為橐鞬筆墨移於鋒壘則  
有陳繼泰焉至若旁邑切纓冠之救則大將軍虎子阿  
龍也黃石之畧家傳猿臂之射習慣寶刀拔而神泣京  
觀築而骨枯又何雄武足重哉畧為紀錄系以古體各  
取表實無分殿最然予更有異者潘烈婦娥娥女郎耳  
拔刀破面投崖自隕亦既難矣乃予方握管而聲響鏗

錚落案頭則誰為為之後有觀者可以興矣

修志徵考引

梁禹甸

緬惟採風問俗不廢歌謠攷古論今攸資載籍故振興  
鉅典卓有深懷而纂輯遺休貴夫博覽長安為秦雍之  
首邑帝王之故都形勝奧區人文淵藪漢及隋唐是為  
西京大畧附見不煩尚譜自宋次道先生特為一書馮  
恭定公復加紹述煌煌邑乘爭光班史豎遭李變續熾  
秦煙而舊刻已空於烈燭新志尚掣于兵戎識者慨焉

是非樞院大人遊心太上無以重不朽於將淪微賴藝  
林君子雅志斯文何由望足徵於既往若旬乾搞無革  
支離鮮暇每欲望洋秋水其如窮轍名山是用敬延宿  
碩以編摩期不煩而不簡綜理縹緗以蒐剔俾無餘而  
無遺條分縷晰璧合珠聯法嚴旨于春秋陋私評于月  
旦肯如太白神遊天姥荒唐寧俟邠卿夢說孫嵩高義  
第思阿房甘露固錯見於文章醴水南山原不改乎登  
涉披詞足攷循迹易求至夫驗消長於版圖用參治亂

紀災祥於事物爰測幾微上第名賢蔚為世美忠猷苦  
節炳爾邦華嶽靈川媚孕貫雕夢騫之英星景雲慶來  
攜鶴懸鱗之牧正氣時存於婦孺逸行間出於縑黃不  
無人恃爵傳豈乏名由德顯賢豪代起故實時增因革  
殊宜流風迭變凡此數十年之行烈詎在一二人之見  
聞斷帙蠹編塵封裨乘金書寶篆滕局名言念先正之  
垂傳早已心貽今日使後學之紬繹宛然身際當時不  
極巖搜穴探奚昭人傑地靈九成之樂非一器之音殘

則非全樂不得不借美於一音千金之裘豈一狐之腋  
而一腋虧則非完裘不可不歸功於一腋布聞有志諒  
辱同心罄厥珍藏襄茲盛舉暫供諸賢流覽旋容不佞  
完歸毋獨秘諸帳中敢請公之柱下

御製脩西嶽廟碑文恭跋

鄂海

往歲

聖駕西巡狩至於華嶽

皇仁廣大軫念蒼生

特發帑金重脩嶽廟臣海奉承

休命卜吉鳩工丹雘維新雲霞綢繅竣事而後恭請

御書匾額并

御製碑文蒙

恩報可迺於今年六月初四日

頒賜到臣臣拜手稽首祇受訖隨命工鐫刻擇日懸匾

樹碑匾曰露凝仙掌其字方廣三尺壯偉奇傑籠

罩萬家龍躍天門而虎卧鳳闕也日月照臨而星

斗不敢並其光也風雲雷雨交發互作而草木為之蒼翠山川為之振動也

天威咫尺儼在目前萬古以來空前軼後豈義獻輩所敢望乎從此永鎮山河焜耀天地微獨增榮嶽廟而已至于碑文一道

聖意深醇帝典王謨統歸陶鑄伏念

皇上以聖神文武之德子惠元元六合一家恩同怙恃而視西陲也更重其深仁厚澤加德于三秦父老



子弟者尤巍煥而難名維西嶽為成物之主職司  
秋令

皇上諄諄為此蓋以祝雨暘之時若祈年穀之順成戶  
積倉箱家餘蓋藏為陝東西數千里百姓介景福  
于無窮也况坤元兌澤薄海內外咸有萬物待養  
之功則為陝東西數千里計即為九州以內億萬  
萬生人計

皇恩如此為臣子者可不知所以報哉惟是

帝德如天感逾覆載自當有左右記註秉國史者書之  
而省志實與國史相表裏蓋志者史之基也臣謹  
將

御製碑文刊入陝西通志俾秦關百二與有千秋萬世  
之光焉且使

皇上天地生成之德永永罔極秦人頂戴傳之世世子  
孫

綸綍昭垂鏤心刻腑與華嶽同其不朽可也

御製平定朔漠碑文恭跋

鄂海

欽惟我

皇上道高五帝功邁三王日照月臨永奠萬年之寶厯  
天覆地載長綿億世之球圖大仁與大勇咸昭聖  
武與聖文偕懋固已六合以內悉荷生成四海而  
遙皆歸化育矣詎有厄魯特噶爾丹者性本凶頑  
計尤陰狡鼓其螳臂頓忘撫字深恩肆彼狼心直  
敢侵凌與國屢宣

丹絳仍怙前非固宇宙所不容抑神人所共憤我  
皇上為億兆生民主一夫不獲時軫

聖懷豈容小醜弄兵遂致邊氓失業於是告之

天地告之

聖祖奮我六師親勞

萬乘運籌決勝悉稟

睿筭之神奇拉朽摧枯盡出

帝心之淵密

龍旂所向芝草旋生虎旅所屯靈泉自湧由是大憝既  
剪餘孽全消永清沙漠之塵風霆萬里重立赫然  
之石竹帛千年凡此鴻勲經臣目覩豐功偉績並  
日月而長存

聖德神威鎮山河而永奠尤以事關軍國應垂久遠  
特允羣臣之請爰頒

御製之文勒石辟雍分輝直省臣思

京師者四方之表率太學者萬國之典型况此西

陸壞臨邊塞乃

翠華行幸之地又義旗經過之方功德巍巍與天罔極  
秦人頂祝尤切瞻依臣已重勒貞珉布昭

聖武而又念陝西通志乃千萬年史筆所闕封域山川  
於是乎在歷朝勲業於是乎書

聖訓煌煌合當列之首簡以示尊

天王大一統之義謹以所頒

御製壽之棗梨典冊有光聲靈不朽從此秦關截案永

垂雲漢之英華華嶽嶙峋長覩日星之炳耀則金甌永固億載無疆而玉燭常調八方有慶矣

祠漢武帝祈雨文

唐

沈亞之

維長慶三年正月己巳櫟陽尉沈亞之承命于大京兆以歲旱用乾肉清醪恭祀於漢武皇帝之祠下因巫人以達其祝語嗚呼陰陽水旱其司惟神五行六氣神得而均如愆作災神何為仁惟神昔帝漢日何祥不臻雍熙滂洋甘露麒麟人何為澤亦仰如春氣配高明歿為

神君非不漏誅屈抑不伸今者獻陽始歲亢而為屯草木蔽萌塞脉沈津不烝不洩逾于十旬雨師恠傲尸違不賓潛深踞高枯此下人風伯囂戲簸陶濃塵潰為凝霾坳若頽雲鴻混突渤上蒙無垠掩蔽光明以垢春農彼風伯雨師皆神所司處位不職荒役不祗神假之權使之胡為上帝如怒其殃孰罹神明胡不督其稽察其欺壞法者戮後期者咎然後陰湊陽蒸雨膏以時發生有涯農力有施今官庶併誠虔虔于祠集于宮室鼓舞



彈吹神其聽之無敢苟祈

祭終南太白湫文

宋 范純仁

比歲不雨被邊之民流離孱亡所不忍視今夏驕亢復甚焦灼涓禱羣望曾莫我助是用遠邀靈液以祈濡澤神既戾止遽獲嘉應旱稼復蘇優渥沾足皆神所賜敢不竭誠敢不腆禮以謝神貺惟聰明正直尚終沛施以庶乎有秋也尚饗

鳳翔太白山祈雨文

蘇軾

維西方挺特英偉之氣結而為此山惟山之陰威潤澤之氣又聚而為湫潭毓罌鐘勺可以雨天下而況於一方乎乃者自冬徂春雨雪不至西方之所恃以為生者麥禾而已今旬不雨即為凶歲民食不繼盜賊且起豈惟守土之臣所任以為憂亦非神之所當安坐而熟視也聖天子在上凡所以懷柔之禮莫不備至下至於愚夫小民奔走畏事者亦豈有他哉凡皆以為今日也神其盍亦鑒之以無負聖天子之意下以無失愚夫小

民之望

告封太白山明應公祝文

前人

天作山川以鎮四方俾食於民以雨以暘惟公聰明能  
率其職民以旱告應不踰夕帝謂守臣予嘉乃功惟新  
爵號往耀其躬在唐天寶亦賜今爵時惟術士探符採  
藥謂為公榮實為公差中原顛覆神不顧救今皇神聖  
惟民是憂民既飽溢曾無禱求衮衣煌煌赤舄繡裳捨  
舊即新以佑我民

祭西嶽華山西鎮吳山文

明太祖

維神磅礴西土為是方之嶽鎮古者帝王必知神有所司故載在祀典為民祈福今予統中國兼撫四夷前者為利罕腦兒伯顏密通中國屢撫不服告神用討已行絕滅自陝西迤北民無兵禍之憂但方今河州東南西南吐蕃川藏等洮州三副使穎素子雖以子入侍於心將欲抗拒朕心有所不安特告神知命將率兵前行進討惟神鑒之

祭黃帝橋陵

洪武四年

朕生後世為民於草野之間當有元失馭天下紛紜乃  
乘羣雄大亂之秋集衆用武荷皇天后土眷祐遂平暴  
亂以有天下主宰庶民今已四年矣君生上古繼天立  
極作蒸民主神功聖德垂法至今朕興百神之紀考君  
陵墓於此然相去年歲極遠觀經典所載雖切慕於心  
奈稟生之愚時有古今民俗亦異仰惟聖神萬世所法  
特遣官奠祀修陵聖靈不昧其鑒納焉

祭告陝西境內山川城隍神 永樂九年

今陝西三司奏境內軍民多患疫癘死亡者衆未底寧  
息朕君臨天下凡物失所皆朕之憂故拳拳夙夜寢食  
弗安維神職司陰陽助國為民禦災捍患萬冀神靈鑒  
予誠悃聞於上帝賜以弘休使疫癘潛消咸增康泰無  
天閼之虞有和平之樂特遣官致香幣牲醴詣神所祭  
告

陝西災疫禱西嶽華山 正統十年六月

國家崇重方嶽歲嚴扶祀所祈默運神化庇佑民生邇  
者陝西西安等府縣沴氣為災時疫大作死者相枕病  
者未已聞之惻然深咎於衷惟神表奠茲土民所恃賴  
覩此災沴能不疚心茲特遣官齋香幣以告於神尚冀  
體上帝好生之心鑒朕憫元元之意弘闡威靈禦災捍  
患民物獲安全之福神亦享無窮之祀

因用兵災荒禱西嶽

成化九年四月

近者陝西地方累被達賊侵擾或刦掠財物或殺擄人

口其為慘酷有不忍言朝廷不得已命將出師為民除害奈征戍日久轉輸浩繁饑饉洊臻死亡相枕興言及此良用惻然惟神受職於天典司此土民困極矣心其安乎是用特遣廷臣敬執香幣遠叩祠下竭誠祈禱伏望神靈感通幹旋造化俾歲時豐稔賊寇殄除疫癘潛消軍民安妥庶副上帝好生之德慰朕憂憫之誠惟神鑒之謹告

大旱地震祭禱西嶽文

成化二十年十月



朕奉天命子育萬民所冀歲稔時和災患不作惟神是  
賴茲者陝西大旱地道震驚民饑荒流離死亡者衆守  
臣以告朕心惻然惟神廟食此土作鎮一方見此困窮  
寧不矜憫用是特遣大臣遠詣祠下潔齋備儀為民請  
命伏望神明大彰顯應潛幹化機時暘雨雪用消凶沴  
變歟歲為豐年躋貧閭于壽域庶稱朕奉天子民之意  
中心懇切惟神鑒知謹告

地震泉湧禱華山

弘治十四年四月  
以上並御製文

去年七月以來陝西地方肅州莊浪等處天鼓鳴響地震有聲已非一次今年正月元日至十七日西安延綏慶陽地震不已而朝邑一縣被災尤甚地裂泉湧水流成渠搖倒房屋壓死人畜以千百計顧茲災異必有其由奏報來聞惕然惶懼夙夜循省寢食靡寧惟神奠此一方民所仰賴特致香帛用告虔誠尚祈翊輔皇祇潛消災沴俯慰民望永祚邦家不勝禱懇之至

祈雪華山文

弘治八年冬十月

楊一清

頃者關中告旱詔修祀事以禱於神清承乏撫臣職當  
將事屬在西徼奔走愆期聖誠所動遽獲感通秋雨優  
渥來牟宿種此神之惠敢不以報然必冬雪應候則蝗  
蝻遁跡春雨時至則苗稼敷榮嗣是以往民有衣食秋  
毫皆神力是賴敢不以祈念茲關陝之民外供三邊比  
自塞有驚塵歲無全稔哀哀顛連日甚一日不意今年  
麥夏穀秋兩無收穫自關以西流離載道匪直天時欠  
順而地道亦復不寧誰其召之靜言增惕維今皇上嗣

大厯服之初恩澤覃布庶政肅清意者小大僚吏慢神虐民奸法奸紀之所致與審如是神聰明正直莫之能違當徑罰厥躬不當濫及百姓謹用率屬致齋滌誠以告維神受命於天永奠西土民之休戚神實聞之尚克靈承帝休幹旋化機轉禍為福豈徒斯人之幸亦神之光謹告

地震告災華山

隆慶二年

張祉

惟聖尊居西服化贊乾坤北方利澤咸仰靈芬惟今地

震特甚於秦近省死傷幾五千人禮宜備祀言官以聞  
上用驚惻遣致明禋社有蓄念敢附以申皇天視聽皆  
自我民上初御宇誠敬寬仁惟宜名祥感戾無因緣社  
棄材復玷冠紳政無興革念徒紛紜孤民之望為天之  
嗔地震未寢亢旱相仍罪在於臣遺憂於君罪在於人  
致瀆於神奉命將事感懼交殷惟天降鑒惟神區分凡  
有割罰宜社之身轉災為祥以慰居民謹告

南山祝文

席增光

瞻彼南山奇峰插天出雲降雨材木生焉其福我蒸黎  
者蓋萬億斯年昊天不造亂越王家荆吳晉豫其盜如  
麻灞漭豐涇既覩千羣之飲馬褒斜漢沔旋驚萬騎之  
吹笳燕子傍誰飛久矣洒新亭之淚蘆花和我老誠哉  
動有道之嗟邦國殄瘁寤寐難安魯連之不帝秦蹈乎  
東海司空之值危亂入於王官仰芳踪其未遠撫深谷  
而盤桓去彼塵垢適我煙巒有酒盈尊蕉黃荔丹已而  
已而維山之湄方者似義圓者似智溫其如仁鎮靜若

癡斜者如倚恍雨中之折角頃者如醉寃高卧乎東籬  
悠哉悠哉維山之隈或俯或仰半壁半苔有凹而曲有  
峻而壘或孤危陡峭如大臣正色垂紳剛毅而難犯或  
鬼崖竄巍如古人經憂履險百折而不回於是躡石磴  
入雲峰踞絕頂俯幽宮登彼南山今有泉涓涓文川武  
鄉思我柏年眺昔日之勝跡想廉讓之潺潺登彼南山  
今有竹叢叢既清以貧思我文同撫篋簪之修竹千畝  
在其胸中登彼南山今有木蓁蓁辭名却聘思我子真

挹釣臺於江上取谷口之殘春登彼南山兮有石嵒嵒  
躬耕而引思我卧龍望定軍之煙樹懷梁甫於隆中已  
矣乎吾舍此安歸乎何以食之烹芝採薇沆瀣為飲兮  
朝霞為餐惟此山是依何以服之紉蘭佩香芰荷為木  
兮芙蓉為裳惟此山是翔何以居之枕石漱流虹蜺為  
帶兮綠蘿為幃惟此山是之何以友之聽鶯狎鷗木石  
為羣兮麋鹿與遊惟此山是求噫噫折腰五斗米慙無  
松菊之榮蓋頭一把茅聊作龜魚之主風月嘗閒不必



買山充隱猿鶴易怨肯教林澗貽羞敢布夙衷山靈昭鑒

久旱禱告華山

本朝  
湯斌

惟神體含金德位列兌方功配雨儀澤潤萬類惟茲闕  
輔實處神宮牆之下雨暘寒燠咸賴神休乃自去歲三  
冬無雪入春恒暘轉亢雲興斯颺塵霾晝曠麥苗涸槁  
百姓無所歸命夫休咎徵事祥異從人良由斌等奉職  
無狀或政乖刑濫而獄有冤民或吏墨兵驕而里盈怨

氣或單丁獨戶窮苦重其租徭或鰥夫孤兒死亡莫之振救以故感動天威召致災眚然神目孔明官之不職宜明賜誅殛奈何舍其有罪而殃我羣黎今斌虔率僚屬蚤夜步禱數月於茲矣呼神莫應籲天罔聞下民何知遂疑神聽不聰而欲別求媚于淫昏之鬼夫山魃澤怪神之所宜屏斥而淫昏之祀明王之所禁也若三日不雨民奔走于淫昏之鬼斌不能止也倘氣運否極而通偶與雨會則民必歸靈于鬼魅將淫祠日甚左道日

興雖告以名山大川澤被生民其誰信之惟神念官吏  
士民悔過之誠敷奏上帝屏風伯搖雨師雲奔電趨貽  
我來牟使農夫饁婦知嶽瀆明神果能闔闢陰陽吐納  
風雨將益堅其畏信之心而淫昏之鬼自不能惑我民  
者是神之眷佑斯民不但錫以有年之慶兼賚以正德  
之福仰戴神庥永之無既謹告

馬汧督誄

并序

晉  
潘岳

惟元康七年秋九月十五日晉故督守關中侯扶風

馬君卒嗚呼哀哉初雍部之內屬羌反未弭而編戶  
之氏又肆逆焉雖王旅致討終於殄滅而蜂蠆有毒  
驟失小利俾百姓流亡頻於塗炭建威喪元於好時  
州伯宵遁乎大谿若夫偏師裨將之隕首覆軍者蓋  
以十數剖符專城紆青拖墨之司奔走失其守者相  
望於境秦隴之僭輦更為魁既已襲汧而館其縣子  
以眇爾之身介乎重圍之裏率寡弱之衆據十雉之  
城羣氏如蝟毛而起四面雨射城中城中鑿穴而處

負戶而汲木石將盡樵蘇乏竭芻蕘罄絕於是乎發  
梁棟而用之矧以鐵鑠機闕既縱礪而又昇焉爨陳  
焦之麥柿招摘之松用能薪芻不匱人畜取給青煙  
傍起樾馬長鳴凶醜駭而疑懼乃闕地而攻子命穴  
浚塹寘壺鑪瓶甌以傾之將穿響作因焚櫛火薰之  
潛氏殲焉久之安西之救至竟免虎口之厄全數百  
萬石之積文契書於幕府聖朝疇咨進以顯秩殊以  
幢蓋之制而州之有司乃以私隸數口穀十斛考訊

吏兵以櫟楚之辭連之大將軍屢抗其疏曰敦固守孤城獨當羣寇以少禦衆載厯寒暑臨危奮節保穀全城而雍州從事忌敦勲効極推小疵非所以褒獎元功宜解敦禁劾假授詔書遽許而子固已下獄發憤而卒也朝廷聞而傷之策書曰皇帝咨故督守關中侯馬敦忠勇果毅率勵有方固守孤城危逼獲濟寵秩未加不幸喪亡朕用悼焉今追贈牙門將軍印綬祠以少牢魂而有靈嘉茲寵榮然潔士之聞穢其

庸致思乎乃若下吏之肆其噤害則皆妬之徒也嗟乎妬之欺善抑亦質首之讐也語曰或戒其子慎無為善言固可以若是悲夫昔乘丘之戰縣賁父御魯莊公馬驚敗績賁父曰他日未嘗敗績而今敗績是無勇也遂死之圍人浴焉有流矢在白肉公曰非其罪也乃誅之漢明帝時有司馬叔持者白日於都市手劍父讐視死如歸亦命史臣班固而為之誄然則忠孝義烈之流慷慨非命而死者綴辭之士未之或

遺也天子既已策而贈之微臣託乎舊史之未敢闕  
其文哉乃作誄曰

知人未易人未易知嗟茲馬生位末名畀西戎猾夏乃  
奮其奇保此汧城救我邊危彼邊奚危城小粟富子以  
眇身而裁其守兵無加衛墉不增築婪婪羣狄豺虎競  
逐鞏更恣睢潛時官寺齊萬壺闕震驚台司聲勢沸騰  
種落煽熾旌旗電舒戈矛林植彤珠星流飛矢雨集惴  
惴士女號天以泣爨麥而炊負戶以汲累卵之危倒懸



之急馬生爰發在險彌亮精貫白日猛烈秋霜稜威可  
厲懦夫克壯雷恩撫循寒士挾纊蠢蠢虎狼阻衆陵寡  
潛隧密攻九地之下愜愜窮城氣若無假昔命懸天今  
也惟馬惟此馬生才博智瞻偵以瓶壺劇以長塹鍤未  
見鋒火以起焰薰尸滿窟培穴以欽木石匱竭箕稗空  
虛惘然馬生傲若有餘弓梁為礪枕松為芻守不乏械  
櫓有鳴駒哀哀建威身伏斧鑕悠悠烈將覆軍喪器戎  
釋我徒顯誅我師以生易死疇克不二聖朝西顧闕右

震惶分我汧庾化為寇糧實賴夫子思謇彌長咸使有  
勇致命知方我雖末學聞之前典十世宥能表墓旌善  
思人愛樹甘棠勿翦矧乃吾子功深疑淺兩造未具儲  
隸蓋鮮孰是勲庸而不獲免猾哉部司其心反側斲善  
害能醜正惡直牧人逶迤自公退食聞穢鷹揚曾不戢  
翼忘爾大勞猜爾小利苟莫開懷于何不至慨慨馬生  
礪礪高致發憤圖沒而猶眠嗚呼哀哉安平出奇破  
齊克完張孟運籌危趙獲安汧陽賴子猶彼談單如何

客嫉搖之筆端傾倉可賞矧云私粟狄隸可頒況曰家  
僕剔子雙龜貫以三木功存汧城身死汧獄凡爾同圍  
心焉摧剝扶老攜幼街號巷哭嗚呼哀哉明明天子旌  
以殊恩光光寵贈乃牙其門司勲頒爵亦兆後昆死而  
有靈庶慰冤魂嗚呼哀哉

弔茂陵文

明  
方孝孺

祇明祀而言旋兮指槐里以西征停策憩於道傍兮覩  
高丘之崢嶸即故老而記之兮惟漢武皇之茂陵整冠

裳而疾趨兮踵遺廟以屏營淒風起於叢棘兮鼙鼙嘯  
於幽瑩慨惟心之靡託兮悲曼志之無成惟君皇之御  
極兮遺炎靈之方熾陋堯禹為未足尊兮畀祖武而弗  
肯繼內瘠民以自殖兮外威靈乎遐裔騁車轍於八荒  
兮侯神人於海濱建千門於萬戶兮殫土木之奢麗美  
軒轅之騰化兮永傲睨乎斯世何盛業之易隳兮洪謨  
鬱而難宣雖暫弱於戎胡兮生民疲弊而不痊奇禍機  
於亟蠱兮妃嗣丁毒而銜冤諒逞心於屠滅兮抑天道

之致然闢土疆之宏廓兮曾立宮之莫固赫兵革之繁  
庶兮委守衛於草露城闕之崇敞兮永斷礎而無所後  
宮之韶冶兮僅或傳其冢墓像初連以旌武兮想壯魄  
之已腐嗚呼哀哉形必有盡兮孰不有亡匪君皇之獨  
然兮尚奚為隱憫而迴遑惟祈生之已甚兮或妖誑而  
過望謂長年而卒老死兮斯足垂戒於昏荒明固有所  
不達兮智固有所短偉才畧之英邁兮哲與愚其相半  
賴聖表而默出邪兮無善悔而能斷雖人恫而財竭兮

終克免乎危亂悼往者之無知兮尚來者之可諫感盛  
哀而相襲兮仰昊天而求歎

誄劉烈士文

有序

本朝

顧咸正

崇禎歲在癸未十一月西安府同州儒學生劉醉白  
名長庚聞閭賊之難焚衣冠訣親友手刃妾雷氏并  
幼女而自經於讀書樓越一年甲申延安府推官顧  
咸正聞其事而義之猶未詳也順治二年乙酉夏徵  
於其所謂州守及州之人始得其詳於是仰天推心

痛哭遣使賻其家設雞黍祭其墓下而為文以告曰  
嗚呼天柱折乎地維裂乎物胥而妖孽乎閨閣胥而娼  
衣寇胥而竊乎嗚呼公何為者生子子乎公何為者死  
烈烈乎嗚呼而繞指猗我鐵也而淤泥猗我雪也賊地  
矢不可轍也賊粟矢不可嚙也賊刃矢不可掇也髻鬕  
者女猗矢不可紕也縞綦者妾猗矢不可涅也甘載儒  
冠我絕也萬卷詩書我茹也五畝祠地我稅也數武園  
樓我穴也寡妻孤兒我玦也仁人君子我碣也公經紀

既畢於是怒目如炬浩歌數闋引取利刃霜飛電掣呼  
妾與女今日永訣左手提其頭顱右手決其骨節愛女  
伏闌干而斷魂少姬整襟袂而濺血人皆號咷公獨啞  
啞乃引領受繩端拱氣絕四體冰僵一腔火熱日月忽  
而昏霾風雨慘其悲咽嗚呼公死乎其未死乎余觀世  
人不死而死諛莽頌操口波舌綺其言也鬼猴冠鼠裳  
盲揖瞎跪其行也鬼辭樓下閣貢妻獻子其家也鬼羊  
狠狐媚剗肉吸髓其官也鬼嗟嗟青天白晝鬼何累累



百千萬年臭穢青史父不敢父子不敢子如是等鬼一  
死永死孰如我公死而不死英英氣魄濯濯神理怒則  
風雷喜則霖雨二祖列宗式鑒伊邇凡有心者誰不興  
起嗟余孤臣視公有泚所恃此心不媿生死書公之事  
血淚盈紙願後死者勉旃雪恥獲之翼之惟公是視長  
庚在天華華其紫公耶非耶死乎不死迢迢千秋請視  
余誄

弔秦公子扶蘇文

譚吉璵

維輓周之天醉錫金策於強秦剪鶉首而是宅滅六國  
而無垠爰去泰而著皇示一統之威神遂坑儒而焚籍  
放典則而不遵何公子之直諫能奮士而信人乃北監  
於上郡爰蒙難而邁屯辭三軍以加劍咸折骨而銷魂  
雲靉靄而慘淡水潺潺而嗚咽尊仲尼於日月揭大道  
於乾坤啟赤帝之過魯奠太牢以明禋宜誦法於萬世  
豈當代之稱仁觀穹窿之遺寢一霑洒於城闔

石鼓文

周宣王

避車既工避馬既同

避薛音我馬志本音吾讀作我

避車既汝

古文

避

馬既駐

籀文駐音陶北野良馬

君子員員邈邈員旂

邈鄭作獵君子指從獵諸

臣員員衆多而有禮儀也獵獵旌旗搖動貌員旂旌上贅旒馬志員通作爰旂通作游當讀作君子爰獵爰獵

爰鹿鹿鍊鍊君子之求維維

讀作關與彎同

酋

馬志作酋音除

弓弓

茲呂寺

諸家皆作時

避毆

古文

其時

音止土高處也薛作孫施作時

其來鏏

鏏

音亦行聲也一曰不行貌

鏏鏏

音憲走貌

鏏鏏

蘇作炙煙塵也音臺

即鏏

鄭作敵與禁鏏

之鏏

即時鹿鹿鍊鍊

音即側行也

其來大玩

古文坐音茨大道也

鏏我

毆其櫟

音卜櫟生曰櫟

其來續續

音獨走貌

攷

古文

其狃

同蜀蘇作

蜀亦  
賦名

右一

鄭作丙文  
薛作辛文

汧

水名出扶風汧縣

毆

讀作繫語助聲

沔沔

一作沔

沔讀如蒸

汧

通作被音彼

淖

一作淖

淵

淖淵水之處

鯉

古文

鯉

處之君子

淖

古文

之

淖淖

通作

又

通作有見

鯉

古文

其

其

音

冊

帛

古文泊字

魚

鰥

讀作鰥音

其

同組一

氏

氏通作底言泊中

鰥

然潔白

泊

中

登之

于組

黃帛

泊

其

鰥

鄭鰥即

又有

鰥

鄭今

又有

鰥

鄭

鮑

音白

其

石本作胡今作

孔

庶

羅

之

變

變

羅

謨

官反

音鐸相如眠  
休曼奔走也

望望

籀文洋字  
今作潯

趨趨

音搏其魚佳

通作

可通

何

佳

維

鱣佳

維

鯉可

何

呂索

同

之佳

維

楊及柳

右二

鄭作甲文  
師作戊文

田車既安鑒

音條轡  
首同

勒駟駟

同駟馬高  
六尺也

六帶

古文

既簡

左驂旂旂

旂旂輕  
舉貌

右驂驥驥

紀偃反  
壯健貌

避以濟于原

石本作達

古原

避戎止洗

今作陸

宮車其寫

寫舍也

秀

同

弓時俞麋豕

孔庶麇鹿雉兔其繚

又有旃

鄭作紳

其戎趨趨

鄭作奔

大作走

車出各

讀作洛

亞

字典同惡又古  
孝經作惡平

獸白臭

古文澤白  
澤獸名

執而

無弋

射

君子道

同

樂

右三

鄭作丁文  
薛作丙文

帥

籀文帥

戔

彼

鑾車

音忽疾也

輶

同策

真

讀作

如

秀

弓

孔碩

孔碩

彤矢

同

四馬

其寫六轡驚驚赴

駿

鄭作

孔庶

廊

薛作廊鄭作鄭

騎

古文

博

一作搏搏

崗

通作

車

載

衍

古文

如

赴如章

徒從整布

遼

古原

溼

通作

陰

陽

赴

同

六馬

射

之矦矦

籀文矦

矦

一作

又有

軀

如虎

獸

鹿

如

眾

台

讀作

爾多賢迪

同陣

禽

奉

雉

避

免

薛作

允

異

右四

鄭作戊文  
薛作丁文

緝

來自東

霑

雨奔

檉

銘

一作  
這悞

湧盈盈

淥同  
淥瀝

君子既

涉

緝馬

流

汧汧

洎

淩

駟  
古文

言鹵

古文

邇

籀文

舫

一作

舟自

廊

薛作廊

徒

駟  
一作駟

湯湯

一作

佳

維

舟

籀文

或陰

或陽

扱

薛作扱

深

戶出于水一方丞赴隍止其奔其敵

今作

且

蘇作

其適

同  
攸

古文

右五

鄭作辛文  
薛作壬文

宣猷乍

籀文作

遼原

乍周衛

導

𢀛

通音

我韻

籀文

攸除

帥攷阪田莛

音鴉草之相糾者

為世里希微德德

蘇音

迫

鄭作攸

罔

薛作罔

泰

木名

柞械其拔

音

櫟

古文

格

音杲木也又同和

甯甯

蘇作甯

鳴條

條山

亞箬其麥

薛作華

何為所旂𡔷𡔷

薛作

憂鄭作變

水盪

引擊也

衛

𡔷封纛

同音

同

右六

鄭作乙文薛作庚文

鈗𡔷

同

𡔷𡔷

音羅語聲也

而師旅真

同

𡔷會同又繹呂左

戎偉

音章行遠貌

弓矢孔庶滔滔

一木滔滔上有左驂二字

是戴

古熾字

𡔷



夫寫矢具隻

即奪字

犇古文

𦍋

音自也積禽

其廷奇

石本作奇按肝音討

日始旦也薛作肝鄭作肝

或羣或友悉率左右燕樂天子嗣王始援

援

同振音真

復古我來攸止

右七

鄭作壬文薛作甲文

攷

彼

走驕驕

音齊鄭音劑

馬廐哲哲兮兮

蘇作華

雉毘

音緯似兔而大

太多度微我師氏憲憲文武可

何其

右八

鄭作庚文薛作巳文

逝水既澌

古文淨

逝衛既平逝行既止嘉對則里天子永

宣

同

日佳

維

丙申旭日景避其雺

籀文

衛

道

蔡馬既

連

陣

敵

敵字之訛

憂

夏

康康

王作甫甫

駘駘

彼

四黃左駘駘左

駘駘

音速

戲戟呂弁女

汝

不執

執德

礪礪

籀文

霧霧

音黎薛作霍一作霍

焱焱施施

音宜旗如貌

公謂大來余及如茲邑害

同

不余及

右九

鄭作癸文薛作乙文

吳

通作虞

人憲

古文疾一作憲

亟

即亟

朝夕儆惕載鹵載北勿奄勿

伏

一作伐

弔

即弔字一作若

而出奇進獻

古文獻

用特歸格執

同藝祖

告于大祝禘嘗受辜

古文享

致其方執

同藝

寓絳中園孔庶

麋鹿籙溼既坦疆理幢幢大田不搜君子可求又有謀

又有始周爰止于是

右十

鄭作己文薛作癸文之陽所刻石鼓文十章

按周宣王狩于岐山天抵紀田漁之事猶

雅有吉日車攻之類也宋時薛尚功鄭樵各為之音釋王厚之考正而集錄之施宿又訂以籀文辨證訓釋亦纂詳矣而參差亦由茲起今採集衆說參以馬鏗田馮少墟諸志雖間有闕文疑義不能強通而存其大畧可備經史之遺矣

遇樵

後漢

黃憲

徵君入秦倚歌于渭橋有負薪者過而問曰子何人斯  
倚歌于渭水之梁乎徵君對曰甫漢室之徵君也弔古  
于秦悲而倚歌非汝所測也負薪者曰吾秦人也以負  
薪為職凡秦之名山廣谷遺基故苑吾皆得而樵焉子  
以弔古于秦以釋厥志吾為子肆言可乎今日暮重關  
渭水東流秦嶺蒼然鳥憩雲木有廬在焉請與子偕歸  
以薪為榻舉瓦觴食鬼草聊以娛子懷也夫秦四塞之  
壤也雖偏鎮于西隅而國之形勢實為天下雄固帝霸

之業也若夫盤互而秀于南者則終南太乙焉隆隆乎  
陰于西極而東望潼關者則華嶽焉東注乎咸陽則澧  
水之所導也其境有蘭池阿房之宮咸陽之南周之鎬  
京也茫茫四陵南北相望秦宮所營豐其鬱焉豈惟涇  
水之望陵哉

疑有誤

西北極乎豳國而奕奕者其梁山也

網緼而蒼蒼內有離宮別館昆明西陂輦道紆曲而相  
屬者秦之上林也鬱然起于鄠之南者有紫閣峰焉其  
周之靈臺廢也久矣橫亘乎藍田者有秦嶺焉霸水之

所出嶢關之所鎮也限于北漢之陞匈奴倚垣而窺者  
秦之長城紫塞也扞蔽乎朔方而胡笳戰馬之所集者  
其賀蘭之山乎聲下龍門景入太華而浩蕩者黃河也  
積雪千里而瀑布之潏漾者則太白焉荆山峙于河則  
大禹鑄鼎之墟也若夫太液曲江之池樂遊細柳之原  
驪山之溫泉新豐之粉社隴山之九坂長安之章臺又  
有博望西郊芙蓉未央長樂建章甘泉之宮不可勝數  
其近而羅列者皆鍾秀于雍州其遠而環帶者皆隱耀

于闕中也

鄆人對

唐

韓愈

鄆有以孝旌門者乃本其自於鄆人曰彼自剔股以奉  
母疾瘳大夫以聞其令尹令尹以聞其上上俾聚土以  
旌其門使勿輸賦以為後勸邑大夫常曰他邑有是人  
乎愈曰母疾則止于烹粉藥石以為是若夫毀傷支體  
以為養在教未聞有如此者苟不傷於義則聖賢當先  
衆而為之也其不幸因而致死則毀傷滅絕之罪有歸

矣其為不孝得無甚乎苟合孝道亦不當旌門蓋生人之所宜為曷足為異乎既以一家為孝是辯一邑里皆無孝矣以一身為孝是辯其祖父皆無孝矣使或陷于危難能固其忠孝而不苟生於逆亂以是而死者乃旌表其門閭爵祿其子孫斯為勸已矧非是而希免輸者乎曾不以毀傷為罪滅絕為憂不腰於市而已黷於政况復旌其門

擬冊邠王文

唐  
劉禹錫



維某年月日皇帝若曰朕讀詩至邠風見古公亶父之  
跡然後知王業之難仰惟我高祖太宗之櫛沐風雨以  
啟天下是用兢惕若墜泉谷邠之舊地積德之餘俗厚  
而忠人悅其上王於茲土克懋賢戚茲爾第四子某質  
重性和神清氣茂威儀儼若恬淡寡言介然風規坐鎮  
流俗固可將吾勤儉宣化邠郊錫爾白杜藩於西土是  
用命使某官某乙持節冊命爾為邠王往欽哉宜聽朕  
命於戲播種者后稷公劉之業善繼者古公亶父之志

積德行義國人戴之詩有七月之章非惟王業艱難亦俗阜化成之風也爾其曰夜思之誕以溫柔之教無奪農時使獨戴周德以忝余一人之命

書褒城驛壁

孫樵

褒城驛號天下第一及得寓目視其治則淺混而茅視其舟則離敗而膠庭除甚蕪堂廡甚淺烏覩其所謂宏麗者訊於驛吏則曰忠穆公嘗牧梁州以褒城控二節度治所能節虎旗馳驛奔輶以去以來轂交蹄劇由是

崇侈其驛以示雄大蓋當時視他驛為壯且一歲賓至者不下數百輩苟夕得其庇饑得其飽皆暮至朝去者寧有顧惜心耶至如棹舟則必折篙破船碎鷁而後止漁釣則必枯泉汨泥盡魚而後止至有飼馬於軒宿隼於堂凡所以汙敗室廬糜毀器用官小者其下雖氣猛可制官大者其下益暴橫難禁由是日益破碎不與曩類某曹八九輩雖以供饋之隙一二力治之其能補數十百人殘暴乎語未既有老妪笑於前且曰舉今州縣

皆驛也吾聞開元中天下富蕃號為治平踵千里者不  
畏糧長子孫者不知兵今者天下無金革之聲而戶口  
日益破疆場無侵削之虞而墾田日益寡生民日益困  
財力日益竭其故何哉凡與天子共治天下者刺史縣  
令而已以其耳目接於民而政令速於行也今朝廷命  
官既已輕任刺史縣令而又促數於更易且刺史縣令  
遠者三歲再更故州縣之政苟有不利於民可以出意  
革去者其在刺史則曰我即去何用如此當愁醉醲當

饑飽鮮囊帛匱金笑與扶終嗚呼州縣者真驛耶矧更代之隙黠吏因緣恣為奸欺以賣州縣者乎如此而欲望生民不困財力不竭戶口不破墾田不寡難矣哉予既揖退老眊條其言書於褒城驛壁

戲撒曲江水伯文

樊鑄

主張於地之血脉者豈不曰水伯乎爾自獸為身面為人控牽兩龍窟宅百谷億有祀矣故數倫於元氣之液弄權於坤輿之竅所云老而不死是謂之賊伊我謂爾

有是夫何者三載二月春服既成冠者五六人才子六  
七人皆簞揚文精開闔武庫游嬉春晝沿洞江干興飛  
壯心舞曳齒胷皆貸白龜之德不負赤鯉之本爾為陰  
發暴殄潛生毒痛竇禍階於沙岸垣死府於花島如數  
子者皆載垂堂之誡爾始若懸流三十仞跳沫四十里  
固應尊而不親豐豈相及爾岸不崕岼流不唐突設人  
所倚之福陷爾孔易之誘俾水街貫堅之功沸聲其如  
蜩蟬捫空呼天迄死不救倏恣化魚之惡誰下拜牛之

惠溺我國寶豈明時棄珠之泉沈彼綵船實元夜藏舟  
之壑與夫覩右山四耳之獸夢潁川一角之人置于大  
江未匹斯甚使揭竿求父之子投牋請弟之兄奏瑩篋  
傷妻之夫厲波濤徇壻之婦罹其凶害不忍荼毒並告  
無辜于上下神祇行哭失至于爾安乎爾今肆行賊虐  
者豈不謂性與習成乎何哉曩者溺孫興公於後湖之  
中淪炎帝女於東海之上化鼈於黃氏之母為魚於歷  
陽之郡爾應恃以舊捷蔓其後圖殊不知事不欲數數

斯辱矣惡貫已滿天命誅之然今歷視而自昔為過之所或天涯或地豈起於侯甸之外且非輦轂之下豈比今日俯九門臨四達使哀聲悲響上及聰聽爾誰欺欺天乎然曲江者南峙仙閣北距靈宮足可效赤水產黃帝之珠胡為殲蒼生竊司命之契況之人也皆編中華俗游無何鄉所冀猛火烈山而莫焚大浸措天而不溺既遇爾省括捨之中縱使飯術解漂之餌山經不沈之木豈可免爾之圖乎茲中江自首創至於今時數千年



子更代易主島流波耗纔可接腋於井蛙詎持頤於海  
鼈爾之所處豈不狹隘乎人之所賞豈有舳艫乎逮天  
寶載我皇恢土德以博之寶澤流以濬之積潤下之波  
瀾用濟川之舟楫豈不謂幸於爾也爾何滿以致溢凶  
以自斃使彼都人士自此之後懼爾同失神之海惡爾  
甚探手之湯匪徒歇爾盛事過自掇也雖悔可追然靈  
莫尊於君人時莫美於陽春君固愛人種德乘春宥罪  
省囹圄去桎梏爾奚得恃宅無聞括守有曲襲不辜於

止獄之候繫餘殃於積慶之家僕謂數子叫天曹訴地  
府黜爾主職在於斯須不然僕見欲上書於承明廬徵  
留近速周處擊劍長逐臂波深搜爾居遁逃則焦僥東  
請長臂者灑漉之又於雄棠北使長股者憑踐之不然  
邀離朱以視之命宋定以縛之然後調馬梅扇獸炭是  
烹是醢以報東門爾儻若混空隱形和水匿象則使牛  
曳蛇尾絕其本根縱逢山見龜毛終難必復矣僕亦宜  
念五六日至於旬時恐爾有詞曰予不誠視成不令而

行故矢在弦上垂而未發儻能易轍僕則既往不咎若  
為刻舟爾則何辭以對徐察爾變惟審圖之

拜嶽言

陳黯

黯自關東隨計來闕下經華嶽祠有巫窵以祈謁乃徹  
蓋整衣馨爐滌觴頰拜而前緘默而退王曰客是行也  
務名邪官邪胡為乎有祈禮而無詞神之胥蠻而答盡  
舒乃誠曰余其來拜以嶽長羣山猶人之有聖賢草木  
之有松蘭百川之有河海鱗羽之有虬鸞屹屹崇崇干

霄柱空載國祀典宜人攸宗拜之思盡乎余之敬詞之  
黯懼乎神之聰且神視果高而聽果深必福其善而禍  
其淫余行合乎神也必照而臨如欺乎神也祈之乎何  
心巫兮余言無妄兮為妄言者之箴

登華旨

沈顏

嘗讀李肇國史譜云韓文公登華嶽之巔顧視其險絕  
恐跌墜不可下乃發狂痛哭而欲縋遺書為訣且譏好  
奇之過也如是沈子曰吁何不論文公之旨耶夫仲尼

之悲麟悲不在麟也墨翟之泣絲泣不在絲也且阮籍  
縱車於途窮輒大慟豈始慮不至耶蓋假事諷時致意  
於此爾前賢後賢道豈相遠文公憤趨榮貪位之人若  
陟懸崖險不能止俾至身危踣蹶然後歎不知稅駕之  
所焉可及矣悲夫文公之旨微沈子幾晦乎

重修園池披錦亭上梁文

宋 南勝

劫火洞然不貸池亭三十景春風暫寓種成桃李幾千  
家雖橫湖多花竹之奇獨披錦據園林之秀自丹淵去

後誰為主已歎荒涼況異邦何處得此花畧宜盼睐莫  
使鶯慵蝶懶虛度三春縱教鴻去燕來葺成一日判府  
安撫郎中主盟勝事著意幽尋為思宮錦之淋瀝忽對  
亭顏而解頤雲斤月斧重修畫棟珠簾露萊風枝依舊  
朱脣翠袖喚回景象增賁名園植萬年棟宇之林出五  
鳳文章之手咽笙簧於繡帳不妨我去君獨留促環珮  
於蓬萊更囑花須連夜發式形儼語用舉修梁梁之東  
亭下花光晚漲紅但願花陰千里共家家錦幄貯春風

梁之西萬綠千紅巧幃幃少綴胸中雲五色爛裁宮錦  
織天機梁之南翠袖朱脣酒半酣試向蓬萊高處望一  
邊花氣與天參梁之北勾引韶華歸花國只解花時醉  
錦幃不知此日東君力梁之上華屋亭亭圍錦幃袖中  
攜取五雲機歸去蓬瀛飾方丈梁之下冉冉飛雲凌棟  
畫但願他年助我儀遍訪遺基著高榭伏願上梁以後  
豐年多暇樂事并來相繼雲斤足四老當年之詠大開  
錦幃破一城和氣之春鼓鼙悉變於笙歌隴畝若安於亭

謝仙人去後留落花流水之春太守謂誰記飲酒作亭之曰

夢遊西嶽文

明太祖

猗西嶽之高也哉吾夢而往去山近將百里忽覩穿雲抵漢巖崖燦爛而五光正遙望間不知其所以俄而已昇峰頂畧少俯視見羣巒疊障拱護週迴蒼松森森遮巖映谷朱崖突兀而凌空其豺狼野鳥黃猿狡兔畧不見其蹤峭然潔淨蕩蕩乎巒峰吾將週遊嶽頂忽白鶴



之來雙鸞異香之繚繞管絃絲竹之聲雜然而來天意  
試仰觀見河漢之輝輝星辰已布吾之左右少時一神  
跪言曰慎哉上帝咫尺既聽斯言方知西嶽之高柱天  
之勢如此於是乎誠惶誠恐稽首頓首再拜瞻天愈覺  
神殊氣爽體健身輕俄聞風生萬壑雷吼諸峰吾感天  
之造化必民獲年豐遂舉手加額豁然而夢覺於戲朝  
乃作思夜必多夢吾夢華山樂遊神境豈不異哉

張子 諸儒評

本朝 王心敬

橫渠先生氣質剛果學力堅苦前無所依旁無與輔超然入孔孟之門而見宗廟之美百官之富嗚呼卓矣至如西銘大旨淵乎通古大人之學知禮成性粹乎會吾夫子之心大化雖未敢遽許而在吾道宗傳中弘毅二字自不愧焉

呂與叔

與叔呂先生清明沈潛在諸昆中尤為粹美而其折節好學舍己從人深潛之思湛定之性即程門亦推先覺

焉向在孔門未知其與二冉如何要之亦漆雕諸賢之  
流亞與

李二曲

二曲李先生學無師傳年未弱冠獨從宋明諸儒中窮  
探宗傳故其所自得于心者體用兼該內外不遺蓋于  
諸儒中獨為不立異同超然獨會者耳然于指示初學  
則恒從程門體認未發一訣教之入見性之門而必合  
語默出處辭受取予一無或苟以為立身之實則先生

既從生平之所自得者舉以語人亦折衷學術親切之路而使之確然不迷也故全集所言多出此旨而至于揭悔過自新為功課盡性無欲為究竟以反身為讀書之要領以名節為衛道之藩籬則聖門宗傳益覺切近而明白矣況其清操峻節挺然以身樹名教之坊而屹為一代師法則尤所為行與教俱以自衛道者哉

陝西通志卷九十四